



Pik poket kamapim dai - P7
Trefik opisa bilong RH - P7

Meri winim skolasip long pailot skul - P11



Isipla wei long promotim bisnis bilong yu

GUTPELA KWALITI, GUTPELA PRAIS LONG PNG

Bisnis Kads | **K120** | **K175**

200 kads + takis
Printin tasol
Wanpla sait, ful kala 300 gsm pepa.

200 kads + takis
wantaim disain wok

Only at... **THEODIST LTD**
THE STATIONERY SUPERMARKET
Waigani Drive, POM | Markham Road, LAE
Ph: 313 9800 / 7232 1300 | Ph: 472 5488 / 7091 7854
sales@theodist.com.pg | saleslae@theodist.com.pg

KOLIM MIPLA NAO!

Redim plen bilong tuna bisnis na klaimet senis



Pasin West tasol!!

Gavana Sasindran Muthuveli inspektim ol polis na woda.

Moa na stori long pes 16.

Poto: Don Niles

Veronica Hatutasi i raitim

OL LIKLIK ailan insait long Pasifik i luksave long hevi bilong klaimet senis na fud sekyuriti na ol i kamapim ol plen bilong stretim ol dispela hevi.

Manesing Dairekta bilong Nesenel Fiseris Atoriti long PNG, John Kasu, i tok NFA i gat kamapim tupela plen, wanpela long fud sekyuriti na narapela bilong klaimet senis.

"Long sait bilong fud sekyuriti, "offshore fishing" long tuna i wanpela rot ogenaisesen i strongim wok long tuna fiseris na bisnis long kisim mani, na long narapela sait, em i strongim akuakalsa i karamapim inlen na kostel eria we 70 pesen pipel i ken go insait long en. Olsem na mipela i mekim ol wok long developim fiseris long ol nambis eria, " Mista Kasu i tok.

Em i tok tu olsem narapela bikpela wok em long mekim ol wof o bris. Em i tok infrastraksa i bikpela samting na ol wok long sevis, developmen na bisnis i ken ran gut, sapos i gat gutpela infrastraksa.

Wok long lukautim ol rip we i wok long dai, setifikesen long solwara na ol samting i sut long dispela eria i mas kamap bikos gutpela helti pis i bikpela samting na olsem, yumi mas lukautim gut ol rip bikos dispela em ples we ol pis i save kaikai long en.

I go moa long pes 2...



BRISBANE

13 times weekly from POM*



CAIRNS

11 times weekly from POM**



SYDNEY

2 times weekly from POM

**MORE DIRECT FLIGHTS
MORE CONNECTIONS TO
AUSTRALIA**

* POMBNE twice daily except for Sat.
** POMCNS twice daily except for Tue/Wed/Sat.
CNSPOM twice daily except for Wed/Thu/Sun.

For more schedule information, go to www.airniugini.com.pg

 **Air Niugini**  
www.airniugini.com.pg

Powi amamas long PRK mekim K40 milien

Fri edukesen polisi bai stap yet



OL dairekta bilong PRK...MRDC menesing dairekta Augustine Mano, Johnny Yawari, John Kapi-Natto, Abraham Murepe (Siaman bilong PRK) na Sauten Hailans Gavana William Powi.

Aja Potabe i raitim

SAUTEN Hailans Gavana William Powi i tok ol papagraun bilong ol risos projek i no ken westim mani nating tasol ol i mas yusim gut mani long larim ol pikinini bilong ol i gat gupela sindaun long bihain taim.

Gavana Powi i mekim dispela toktok hap asde long Pot Mosbi taim Petroleum Risos Kutubu (PRK) na Mineral Risos Developmen Kampani (MRDC) i tokaut long K40 milien dividen mani PRK i kisim long MRDC.

Mista Powi em i wanpela dairekta bilong PRK. Em i makim maus bilong Sauten Hailans Provinsal Gavman, we 40 pesen bilong dispela mani i go long en.

"Mi amamas long lukim PRK i kisim dispela bikpela mani stret. K40 milien em i bikpela mani stret. Mi tok tenkyu long bosman bilong

MRDC Augustine Mano na menesmen tim bilong en husat i bin mekim hat wok long larim mani bilong PRK i gro,"Mista Powi i tok.

Ol pipel bilong Foe na Fasu insait long Kutubu, Sauten Hailans Provins wantaim pipel bilong Kikori paipain eria long Galp Provins i bin kamapim PRK long yia 1992 taim wel i stat long go aut long graun bilong ol.

MRDC i save lukautim na menesim2 pesen ekwiti na royelti mani ol papagraun long Kutubu na Kikori i save kisim long Kutubu wel projek.

Nau long yia 2015 ol invesmen na ol arapela bisnis bilong PRK i go antap long mani mak K1.55 bilien.

Mista Powi i salensim ol narapela papagraun o lenona kampani tu long bihainim dispela pasin bilong inves na mekim bisnis olsem PRK i mekim.

"Ol arapela papagraun i mas

bihainim dispela pasin. Yusim gut mani na invest long bihain taim. Wel na ges bai pinis. Gol na kopa bai pinis.

Tasol invesmen yu mekim long gupela bisnis bai karim yu go het long bihain taim we ol pikinini bilong yu bihain taim bai kisim benefit,"Powi i tok.

Em i tok Sauten Hailans bai kisim benefit long dispela gupela invesmen PRK i mekim long en.

Em i tok tenkyu tu long bipo gavana bilong Sauten Hailans Hami Yawari na wanpela biknem man na lida bilong Kutubu, Sosoro Hewago long bungim tingting bilong ol manmeri Foe na Faso long Kutubu long kamapim PRK.

"Yawari na Hewago tupela wantaim i dai pinis tasol gupela samting tupela mekim nau i karim kaikai na ol pipel bilong Sauten Hailans na Galp bai kisim benefit, Powi i tok".

PRAIM Minista Peter O'Neill i tok fri edukesen polisi bilong gavman bai go het yet na dispela bai helpim ol papamama na skul pikinini.

"Mipela bai larim yu i kisim fri edukesen na fri na gupela haus sik sevis. Bai yu kisim gupela komyuniti sevis we yu olsem manmeri bilong dispela kantri inap long kisim,"Mista O'Neill i tok.

Long makim namba 40 indipendens de bilong PNG las wik, Mista O'Neill i tok gavman bai luksave gut long ol pipel long kisim save gut.

"Gavman bai mekim ples i stap gut na kamapim planti sans long mekim bisnis. Dispela fri edukesen polisi em i wanpela sain olsem gavman i mekim

planti gupela samting insait long kantri bilong yumi," Mista O'Neill i tok.

PM O'Neill i tok tude moa long 2 milien skul pikinini i stap long skul na i kisim helpim long gavman aninit long fri edukesen polisi.

"Dispela em i no inap. Narapela samting gavman bai mekim em long apim namba bilong ol tisa na kirapim stendet bilong save ol tisa i kisim," Mista O'Neill i tok.

Em i tok kantri bilong yumi i gat planti risos olsem gol, kopa, wel na ges.

"Tasol ol manmeri em i bikpela na namba wan risos gavman i putim ai long en.

Yu, ol manmeri na pikinini bilong dispela

kantri i save kirapim ikononi bilong dispela kantri na givim pawa long ol komyuniti," em i tok.

"Olsem na ol pikinini bilong yumi mas kisim gupela save. Mipela i laikim planti yangpela manmeri long go skul long ol yunivesiti.

"Gavman bilong yumi bai go het long sapatim ol yangpela manmeri husat i skul long ol teknikel skul o kolis insait long kantri.

"Gavman i wok long apim namba bilong ol spes long ol yunivesiti na ol arapela kolis.

"Mipela bai strongim ol sumatin bilong ol teknikel na vokesenel skul long larim ol i kisim gupela wok mani long ol turis bisnis, fiseris na egrikalsa," Mista O'Neill i tok.

Namba bilong 'stirit pikinini' i go antap

Aja Potabe i raitim

OLGETA de namba bilong ol pikinini husat i no gat papamama i wok long groa bikpela.

Yumi save kolim ol stirit pikinini. Wanpela man husat i save lukautim ol stirit pikinini i wari nogut tru olsem namba bilong ol dispela kain

pikinini i wok long groa olgeta de.

Nesanel Dairekta bilong Life PNG Care Collin Pake i tok ol papamama i karim na lusim planti pikini long stirit.

"Ol dispela pikinini i nidim marimari na laikim bilong papamama. Tasol ol papamama i save lusim ol na i no gat wanpela manmeri i save lukautim ol,"Mista Pake i tok.

Em i tok Life PNG Care i wok long lukautim ol dispela kain stirit pikinini long haus bilong em yet.

"Nem bilong haus bilong mi em i Famili Hom Ke (Family Home Care). Mi na meri bilong mi i nau lukautim moa long 22 pikinini,"Pake i tok.

Pake i tok em na meri bilong em i wok long lukautim ol dispela pikinini na strongim ol wantaim ol skul toktok na arapela samting mama papa i save mekim long pikinini.

"Ol bai kamap ol wok manmeri bilong dispela kantri long bihain taim. Sampela bai kamap dokta na

nes long haus sik. Sampela bai kamap tisa.

Sampela bai kamap ol lida man,"Pake i tok.

Long dispela as, Pake wantaim meri bilong em i save lukautim ol dispela kain pikinini.

"Mipela i givim lav na ke we ol dispela pikinini i misim long en. Papamama bi long ol inap long givim lav na ke tasol ol i lusim pikinini long stirit," Pake i tok.

Gavman na ol ararpela kampani i luksave pinis long wok Pake na meri bihong en i wok long mekim.

Long Desemba 2, 2015, nupela Kumul Konsolidedet Holdings bai kamapim wanpela fanresing kaikai long kisim mani long helpim gupela wok bilong Pake and meri bilong.

Sampela ol kampani olsem Pasifik Balens Fan tu i luksave long wok bilong Mista Pake na long mun Jun ol i givim K15, 000 long sapatim dispela wok.

Redim plen long tuna na klaimet senis

I kam long pes 1...

Em i tok tu olsem El Nino weda o taim bilong bikpela san tu i save kamapim hevi long pis na wanpela em long sait bilong ol pis stok.

Wanpela bikman bilong Fiji Fiseris i tok Fiji tu i gat plen na em i wok long developim lakauakalsa long eria bilong tilapia na kuka faming.

Em i tok ol i strongim ol edukesen awenes program long ol hevi na samting bilong mekim long klaimet senis.

Forum Fiseris Atoriti em ogenesesen i save go pas long stiaim wok bilong fiseris long Pasifik i tok plen bilong em long 10-pela yia i kam i fokus long tuna stok na lukautim gut na pis i ken stap long ol pikinini i ken yusim long bihain taim, lukim olsem pipel long ol Pasifik kantri

i benefit o kisim gupela samting long en, kamapim wok,



Tuna pis

menesmen na ol stekholda i stap insait long wok na toktok bilong tuna.

Long wankain taim tu, ol toktok i bin kamap long Yuropien Yunien (EU) i putim ol sampela kantri long Pasifik, PNG namel long ol, long "Yelo kad."

Ol EU kantri i bikpela maket bilong tuna long ol kantri long Pasifik we ol i save kisim namba wan sans long maket pastaim long ol narapela kantri.

Dispela i save mekim ol liklik ailan kantri long Pasifik i kisim

gupela ikononik benefit long salim ol pis i go long ol maket long ol EU kantri.

Tasol ol EU i gat ol lo long sait bilong sefti na haijin long ol pis we ol kantri i save redim na salim, ol i bihainim gut lo long kisim pis o, ol i kisim long ligel rot na ol arapela moa olsem.

Bikos sampela Pasifik kantri i brukim ol EU lo, em i putim ol long yelo kad we i min olsem ol i no kisimhelpim long bihainim gut na plenim gut ol samting long gupela bilong fiseris na

tuna indastri.

NFA Dairekta, Mista Kasu i tok bihain long PNG i kisim yelo kad long las yia, em i kamapim ol rifom o ol senis long lo na menesmen ekt na odit, na nau em i wetim EU i kam bek long en.

Mista Kasu i tok ol rifom i gupela long helpim tupela sait wantaim.

Bung i kamapim sampela gupela tingting, toktok na disisen long givim stia, moa yet, long sait bilong menesmen, lukautim ol pis stok long bihain taim, wokim ol faktori long prosesim pis insait long ol wan wan Pasifik kantri yet, na moa.

Bung i kamap gut na i pinis asde we moa long 300 pipel i makim ol kantri long Yurop, Esia, Latin Amerika, Yunaitet Stets na ol Pasifik kantri i bin stap insait long en.

Ol Hailans i kisim helpim

Esther Bralyn Wani i raitim

KATOLIK Bisop Konprens (CBC), Caritas PNG, Australia na Nu Silan i go long 5-pela provins long Hailans long lukim ol pipel i kisim bikpela bagarap long strongpela san na ais i pundaun na painimaut ol sampela ol samting i kamap.

CBC i tok tenkyu long O'Neil/Dion gavman long givim mani hariap long baim ol kaikai bilong ol hap i kisim bikpela bagarap na tu Sif Seketeri Sir Manasupe Zurenoc long hariap na kisim ol saplai i go.

Jenerel Seketeri bilong Katolik Bisop Konprens long PNG na Solomon Ailan, Pater Victor Roche i tok ais i pundaun i bagarapim ol kaukau we i namba wan kaikai bilong ol pipel long Hailans.

Pater Roche i tok ol wara i save ran na ol liklik wara i drai pinis.

Em i tok ol skul i op hap de na ol haus sik i op long sotpela taim tasol na bihain ol i pasim.

Ol pipel i pret olsem ol i ken painim sik bikos i no gat wara. Long wankain taim, Caritas PNG i wok bung wantaim Caritas Australia na Caritas Nu Silan long givim ol rais beg na kaukau ol i kisim long ol narapela peris long ol hailans provins bilong givim long ol lain i kisim bagarap.

I bin gat wanpela bung namel long ol 4-pela daiosis bilong Hailans, Mendi, Wabag, Maun Hagen na Kundiawa. Ol i kamap wantaim ol longpela taim plen na sotpela taim plen.

Ol plen ol i kamap wantaim em ol tenk wara, rop bilong kaukau, skelim ol kaikai na mekim ol awenes program.

Toktok i kam long Edukesen Seketeri long 40 yia Indipendens

"Mi salim tok halo bilong 40 yia Indipendens i go long ol pipel bilong Papua Niugini (PNG). Taim yumi redi long amamas long dispela impoten taim, yumi mas lukluk bek long ol samting yumi winim long edukesen sekta," Ekting Seketeri bilong Edukesen, Dokta Uke Kombra i tok.

Dokta Kombra i tok edukesen, trening na litresi i bikpela samting long developmen, bel isi, na gutpela sindaun bilong yangpela kantri, PNG. Em i tok taim PNG i kisim independens long 1975, Edukesen sekta i mekim bikpela senis na helpim long developim kantri.

Edukesen i no bin stat wantaim Indipendens long 1975. Developmen bilong edukesen i bin stap long han bilong ol sios. Ol namba wan Westen kain skul i bin op long 1870 wantaim ol Misineri long Papua rijen. Dispela em bipo long koloniel gavman i kamap long rijen.

Ol dispela misineri i bin givim ol besik edukesen long rit na rait. Ol lokal pipel i ken ritim Baibel, go pas long ol samting bilong sios na mekim gut ol sindaun bilong ol long ol viles.

Trupela kamap bilong edukesen i bin stat taim Dipatmen bilong Edukesen i stat long 1946 olsem hap bilong Teritori Edministresen. PNG i lukautim em yet stat long 1973 wantaim selp gavman, na kisim independens long 1975.

Sampela ol bikpela developmen long edukesen em, yunifaid edukesen sistem, tisa sevis, tisa sevis komisin, standet salari skel bilong olgeta tisa na trupela patnasip long edukesen plening na mekim disisen.

Edukesen i bin skelim wok namel long ol sios na gavman. Ol sios i save lukautim olsem hap bilong ol skul na institusen inap nau.

Dispela i save givim helpim na ol gutpela samting olsem; wok bung na mekim disisen, olgeta edukesen atoriti i kamapim plen, olgeta tisa bai gat wankain tisa sevis, skulim wanpela Karikulum, tisa trense na gutpela tisa trening.

Edukesen sistem i bin lukim planti salens i mekim gut long kwalati bilong edukesen na olgeta pikinini i ken skul, gutpela trening bilong ol tisa, konstraksen bilong planti skul na institusen long bungim moa populesen na givim sans long ol sumatin husat i no pinisim skul long Gret 10 na 12 we i wankain long standet bilong wol.

Wanpela bikpela rifom bilong edukesen sistem i bin kamap long 1993 we i lukim ol bikpela senis olsem kirapim ol elementri skul na mekim gut ol hai skul i kamap sekenderi skul. Planti ol bikpela samting i kamap long las 40 yia i groim na mekim sistem kamap bikpela.



Ol man long Kiripia viles insait long Tambul Distrik long Westen Hailans provins i kisim rais long ol Caritas. CBC Midia

A SMART SOLUTION FOR SMALL BUSINESS

Mobile & Internet Banking

Make supplier payments, transfer funds, pay workers and manage accounts anytime, anywhere.

EFTPoS

Safer, convenient solution for you and your customers. Reduces risk of cash handling and builds financial history.

Smart Business Debit Card

Make payments for goods and services and withdraw cash via the ATM and EFTPoS with your Smart Business Debit Card.

PLUS - Smart Business Loan

By having a Smart Business Package Account, you can have access to a Smart Business Loan.

BSP Smart Business Package

offers essential products that can help SMEs manage business funds and provides a pathway for growth.

NOW OPEN

BSP SME Business Centre
Waterfront Place Shopping Mall,
Port Moresby.



320 1212 / 7030 1212 - 24/7
servicebsp@bsp.com.pg
www.bsp.com.pg



IPBC bai senisim nem

Aja Potabe i raitim

NEM bilong Indipenden Publik Bisnis Kopresen (IPBC) bai senis i go long Kumul Konsolidetet Holings (KCH).

Siaman bilong IPBC Pual Nerau i tokuat long Mande long wanpela bung IPBC i bin holim long makim 40 yia independens anivesari bilong PNG.

Mista Nerau i tok olgeta wok samting bai no inap senis tasol nem bilong kampani tasol bai senis na opisal lonsing bilong nupela nem bai kamap long Desemba 2, 2015.

“Olgeta stet on entaprais (SOE) stap aninit long IPBC bai stap yet. Tasol nem bilong

IPBC bai senis i go long KCH,”em i tok.

Dispela senis i kamap bihain long gavman i bin senisim IPBC Act o loa we gavman i bin pasim long kamapim IPBC.

Mista Nerau i tok IPBC wantaim ol SOE o arapela kampani bilong IPBC i bin givim sevis i go long gavman na pipel bilong PNG insait long 40 yia.

“Ol SOE olsem PNG Pawa, Wata PNG, PNG Pots, na Pos PNG i save givim sevis long ol pipel bilong dispela kantri. Ol i save mekim mani bilong gavman long ranim dispela kantri,”Nerau i tok.

“Wankain olsem PNG i bin kisim independens long Australia long yia 1975, IPBC bai

nau senisim nem bilong en i go long Kumul Konsolidetet Holings,”Mista Nerau i tok.

Long dispela Desemba 2, KCH bai kamapim wanpela sariti dina long kisim mani na helpim ol tarangu manmeri.

Dispela mani KCH i kisim long sariti dina bai go long Laip PNG Kea, Cheshire Home, na PNG Kensa Faundes.

“Ol dispela non-gavman ogenesesen i mekim gutpela wok long stretim sindaun na laip bilong manmeri PNG.

“Mipela i amamas long wok-bung wantaim ol na sapotim gutpela wok ol i mekim long senisim laip bilong sampela tarangu manmeri insait long PNG,”Mista Nerau i tok.

O'Neill: PIF bung kamap gut tru

Aja Potabe i raitim

PRAIM Minista Peter O'Neill i tok namba 46 bung bilong Pasifik Ailan Forum (PIF) long Pot Mosbi i kamap gut tru.

Mista O'Neill, husat i siaman bilong PIF, i tok dispela bung long Pot Mosbi i bin kamap gut stret bikos long hatwok bilong ol wok manmeri bilong PNG Gavman na ol pipel bilong dispela kantri.

Mista O'Neill i tok ol lida bilong Pasifik Ailan i bin toktok long klaimet senis birua we mak bilong solwara i wok long go antap na i laik karamapim ol liklik ailan insait long Pasifik rijon.

“Klaimet senis birua na global woming em i wanpela bikpela samting mipela i bin toktok long en. Long mun Desemba, mipela bai bungim ol arapela biknem wol lida long Paris, Frans na mekim moa

toktok long klaimet senis,”Mista O'Neill i tok.

Ol arapela samting ol lida i bin toktok long dispela wan wik bung em ol toktok long Wes Papua hiumen raits, fiseris, sevikel kensa, infomesen na komunikesen teknoloji.

“Mipela i toktok gut stret long ol dispela samting. Mi bai toktok wantaim ol poroman bilong yumi long Indonesia na askim gavman bilong Indonesia long stretim laip bilong ol brata na susa bilong yumi long Wes Papua, na neks yia bai mi givim ripot i go bek gen long PIF,” Mista O'Neill i tok.

Seketeri Jeneral bilong PIF Dame Meg Taylor i bin amamas long kam bek long kantri bilong en na holim dispela bung.

“Dispela em i namba wan taim bilong mi olsem Seketeri Jeneral long go pas long dis-

pela kibung long ples bilong mi yet. Mi laik tok amamas long PNG Gavman na olgeta manmeri husat i sapotim mipela long holim gut dispela miting bilong ol lida bilong Pasifik rijon,” Dame Meg i tok.

Praim Minista bilong Nu Silan John Key i tok namba 46 PIF bung long Pot Mosbi i kamap gut stret.

Em i amamas tru olsem dispela bung i bungim ol lida bilong Pasifik rijon long toktok long faipwela namba wan samting long laip bilong ol manmeri Pasifik.

“Mi amamas stret. Nu Silan bai sanap wantaim ol poroman bilong en long Pasifik. Mipela i sapotim Pasifik ailan,”Key i tok.

Namba 46 PIF bung long Pot Mosbi i bin stat long las wik Mande na pinis long Fraide.

Yurop bai daunim grinhaus ges



Mista Cañete (namel) i sanap wantaim sampela lida bilong Pasifik ailan bihain long ol i sainim agrimen. Foto: Nicky Bernard

YUROPEN Yunion (EU) bai daunim mak bilong grinhaus ges (GHG) ol 28 memba kantri bilong en i save autim long ol faktori na bikpela indastri.

Yuropen Yunion Komisina bilong klaimet eksen na eneji, Miguel Arias Cañete, i tok EU i laik sevim ol pipel bilong liklik ailan na dispela em i wanpela namba wan samting EU bai mekim long daunim mak bilong global woming na klaimet senis.

Mista Cañete i stap long Brasels long kantri Belgium na em i bin kam long bung bilong namba 46 Pasifik Ailan Forum long Pot Mosbi.

Em i mekim dispela toktok las wik Tunde long Pot Mosbi.

“Long sevim ol liklik ailan kantri long Pasifik we solwara i wok long karamapim, EU bai sapotim ol lida bilong Pasifik long askim ol bikpela kantri long daunim mak bilong GHG ol wan wan kantri i save autim long ol indastri na faktori,” Cañete i tok

Cañete i sainim pinis long Tunde wanpela join dikleresen o bung agrimen wantaim ol lida bilong Federetet Stets ov Maikronesia, Nauru, Palau na Marshall Ailans. Niue na Tonga bai sainim bihain.

Dispela agrimen em long larim ol dispela Pasifik Ailan kantri i yusim gutpela samting

bilong kamapim pawa o eneji.

Dispela agrimen bai larim ol kantri i yusim san lait long kisim pawa, wara long kamapim haidro pawa, na yusim win long kamapim pawa o eneji.

Long mun Desemba wanpela bikpela intenesenel bung bai kamap long Paris, Frans. Long dispela bung, ol Pasifik lida bai makim maus bilong pipel na toktok long klaimet senis.

Wanpela bikpela samting ol Pasifik na wol lida bai toktok long Paris em long daunim mak o level bilong GHG.

GHG em ol ges nogut i save kamaut long ol faktori na ol bikpela indastri. Planti ol bikpela kantri olsem Amerika, Australia, Saina, Japan, Rasia, na ol EU kantri i save kamapim moa GHG bikos ol i gat planti faktori na indastri.

GHG i save mekim ples i go hat moa yet na ol bikpela ais long Not Pol na Saut Pol i wok long melt o kamap wara gen. Dispela proses em ol i kolim global woming.

Global woming i save kamapim klaimet senis. Wanpela sain o mak bilong klaimet senis em i senis bilong taim bilong ren na san.

Dispela senis i stap na mak bilong solwara i wok long go antap.

Pikinini i dai long Independens de - Jiwaka

LONG Independens de, Septemba 16 olsem 49 pipel i kamap saspek long dai bilong wanpela Gret 5 mangi husat i gat 11 krismas long Banz insait long Jiwaka provins.

Asisten Komisina bilong Hailans Rijon, Teddy Tei, i tok 49 saspek i stap insait long 1000 man long Kuma Traib bilong Kudjip husat i holim ol samting bilong pait taim ol narapela pipel i selebretim Independens.

Drai san i mekim ol pipel i kaikai kokonas long stap laip – Madang

LONG Mangem Ke Senta bilong ol Manam long Madang provins, samting olsem 2000 pipel i kaikai kokonas ol i kukim long paia long stap laip.

Dispela drai san i mekim ol pipel i lukim laip i hat tru na long wankain taim ol gaden kaikai bilong ol i bin karamap long das bi-

long volkeno.

Ol pipel long hap i no gat planti graun long planim kaikai bilong ol na ol kokonas tu i no karim planti kaikai.

Ol sumatin i pundaun long klasrum bikos ol i no kaikai olsem tripela taim insait long wanpela de.

Gavman i lukluk long strongpela san

SIF Seketeri Sir Manasupe Zurnuoc i tok wantaim Pasifik Ailan Forum (PIF) na Independens selebresen i pinis, ol i lukluk bek long strongpela drai san nau.

Sir Manasupe i tok ol hap i kisim bikpela bagarap em, Kundiawa-Gembolg long Simbu, Tambul long WHP, Ialibu- Pangia na Mendi long Sauten Hailans na Kandep

na Laigam long Enga provins na i no olgeta hap long Hailans.

Long wanpela asesmen ripot bilong Nesenel Disasta Senta (NDC) samting olsem 1.09 milien pipel i kisim bagarap long Hailans wantaim saplai bilong neks tripela mun bai nidim mani olsem K10.5 milien na lojistiks long K1.6 milien.



Dame Meg Taylor na PM O'Neill i toktok long ol nius manmeri bihain long PIF bung.

Foto: Nicky Bernard



PIH Saveman *Nius*

"I kam long Pacific International Hospital Port Moresby"

Ph: 311 3000 and 799 88000 Textline 7155 8866 Website: www.pih.com.pg

Independence from major health worries

FORTY years. Such a length of time is usually considered as one "generation". With any declaration of independence, citizens of the new state expect to have greater freedoms compared to the time before independence. An element of fear and helplessness in one's own state does not speak well of the freedom these citizens are supposed to possess. But, sadly over the first generation of PNG's statehood, many citizens were not very free from the fears and worries about their health. Now, with the dawn of the second generation for the state of PNG, the Pacific International Hospital has arisen to meet the challenge and is very glad to contribute to the strength of the well-being of the citizens of PNG, to be free of the fears of many medical worries.



Prime Minister of Papua New Guinea, Peter O'Neill talking at the launching of the new PIH at 3-Mile Hill earlier this year, which was held on his 50th birthday, 13 February 2015.

Freedom from fear of the cardiac unknown.

For decades Papua New Guineans had to bear huge anxiety once their doctors mention to them that their ECG test, or their record of high blood pressure or hypertension, could mean they have a heart problem. To get the gold standard in cardio diagnostics meant going overseas. Now, in 2015, everyone is free of that limitation, as right here in Pacific International Hospital, there is PNG's first and only Cath Lab. The Cath Lab allows the cardiac specialists to perform an Angiogram on patients. An angiogram is considered the "gold standard" in diagnosing how the heart performs. This video x-ray of one's heart gives an almost unquestionable image of what is going on in a patient's heart. The special dye or ink that is brought close to the heart through a catheter is filmed as it flows through one's heart, indicating heart health.

Not only does the Cath Lab allow for Angiograms to be performed, but through the Cath Lab heart surgeons can perform minimally-invasive procedure for heart treatment, the Angioplasty. This means that

the patient is not opened-up like in an open heart surgery, but, the catheter is again used, and in this case it is used to implant stents in the partially blocked arteries to promote flow of blood.

Freedom from blocked arteries.

When the angiogram shows that the blockage is already close to 100%, the patient has an option to undergo a Coronary Artery Bypass Graft (CABG). This is often referred to as open heart surgery. In this case, our chief cardio-thoracic surgeon, Dr. Omprakash Sharma and his team, will operate on the heart patient and get an artery from another part of the patient's body to put it as an alternate passageway for the blood flow, to go around (or bypass) the blocked area and improve the blood flow within the heart. Seven CABG operations have already been performed at PIH so far this 2015, the first time it is being done in PNG, and all 7 were on Papua New Guineans and all were very successful with the patients recovering and recuperat-

ing at very good rates.

Freedom from the fear of progressive loss of eyesight.

Many Papua New Guineans are developing lifestyle diseases like Diabetes. And once there is an onset of Diabetes, one of the dire effects is its effect on eyesight. With the coming of PNG's first retina surgeon in the person of Dr. Sudesh Subedi, along with the specialized equipment related to it, retina surgery can now be done in PNG! The Ophthalmology Department also offers advanced treatments like Eye Laser treatments using YAG Lasers and Diode Lasers.

Freedom from want of more precise and more accurate medical images.

More than a dozen years ago, the initial diagnostic center from which PIH grew from began offering the first CT-Scan in Papua New Guinea. Always driving to "push the envelope" in medical technology in PNG, The Pacific International Hospital began this 2015 operating the very first and

only Magnetic Resonance Imaging (MRI) machine, a Philips 1.5 Tesla machine. This very advanced technology uses magnetic waves to produce images, with the images coming in at a very high resolution and with a wide variety of contrast choices.

This makes it very ideal for soft tissue analysis, like that for muscles, for ligaments, for tendons, and even for tumors. A particular sector which has benefitted much from this are the athletes, who through the MRI can have their doctors see precisely if they have ACL tears in their knees and other internal injuries.

In addition to the MRI, there is also a new 64-slice CT-Scan machine, also a Philips, which provides higher resolution images compared to the previous CT-Scan. Other machines like a digital X-ray and several ultrasound machines add to the complement of the imaging department.

Freedom from uncertainty regarding breast cancer.

With the high incidence of breast cancer among the women of Papua New Guinea, the Imaging Services of PIH is also one of only two centers in Papua New Guinea which has a mammogram, the vital x-ray type of device which is the appropriate modality in screening for breast cancer. With this service, so many PNG women have had their breast cancer or potential for it detected early enough so that it does not progress to the more severe and potentially fatal stages.

Freedom from HPV infection that leads to cervical cancer.

The Pacific International Hospital is one of the very first to offer the Gardasil Vaccination which protects women from HPV infection, and so deters the possibility of getting cervical cancer.

Independence of the availability of 24/7 emergency services.

The Pacific International Hospital, in its earlier days at the smaller 4-Mile PIH facility, was the very first medical facility in Port Moresby to offer a 24/7 emergency room, the only place open during late nights in case of sudden emergencies.

Independence of blood supply.

The new PIH at 3-Mile is the only private hospital in PNG with its own blood bank.

Independence of maternity section critical care.

PIH is the very first hospital in PNG with a fully-dedicated Neonatal Intensive Care Unit (NICU), within its maternity wing, for newborn babies who would need specialized intensive care, like, for example, those who are born prematurely.

With all this equipment and specialists, the Pacific International Hospital is indeed every day a living example of moving forward and truly lives up to what our national anthem ends with "we're independent and we're free, Papua New Guinea."

Globeathon PNG 2015

Join the walk to fight women's cancers

Awareness walk for women's below-the-belt cancers, specially cervical cancer

Sunday, 27 September, 8:00 am



From Pacific International Hospital grounds, 3-Mile Hill, Port Moresby

No entry fee, t-shirts to be given out on a first-come first-served basis, refreshments from Coca-Cola Amatil and Snax from Lae Biscuit

supported by Bank of PNG, SP Brewery, BSP, McNash Fitness, Coca-Cola Amatil and Lae Biscuit Co.

email: anandh_marketing@pihpng.com
or text to PIH textline 7155-8866
for pre-registration

Koreksenal Sevis kisim nupela ben

Frieda Sila Kana i raitim

BIHAIN long 46 ya olgeta nau Koreksenal Sevis (CS) i gat ol nupela instramen bilong Paip na Dram, ben bilong ol.

Long Fraide 4 Septemba CS Kominisa Michael Maipoi bin rausim olpela paip na dram bilong komyuniti ben na opim nupela paip na dram long karim stori bilong Ben i go moa winim 46 ya.

Long taim CS i bin kisim ol dispela dram na paip 46 ya i go pinis, ol i no bin baim sampela nupela long kisim ples i kam inap nau long 2015 arere tasol long 40 ya independens eniveseri na ol i kisim.

Ol nupela beg paip na dram i bin kam long Scotland long McCallum Bagpaipes Limited. Minista bilong Koreksenal Sevis na Memba bilong Wewak Open, Jim Simitab i bin mekim luksave long wok bilong Komisina bilong Koreksenal sevis na ol opisa bilong em long painim mani long baim ol dispela instramen.

Mista Simitab i bin tok olsem, em i amamas bikos kain pasin olsem em i save litimapim nem bilong dipatmen and ministri long ai bilong ol komyuniti na pablik.

“Ben Yunit bilong Korek-

senel Sevis i no bilong pilai long taim bilong ol bikpela seremoni tasol, nogat, em i ken mekim wok bilong kamapim gut komyuniti autris program long wei bilong stretim ol kalabus lain long i go bek gen insait long komyuniti bilong ol,” Mista Simitab i tok.

“Mi laik lukim planti moa komyuniti autris program kamap wantaim musik, bikos msuik em yumi olgeta save olsem, em i gutpela samting bilong oraitim tingting bilong man na kamapim senis,” em i tok.

Mista Simitab i tok em i bin go long Fiji long Novemba 2014 na em i lukim pasin we ol koreksenal ben yunit bilong Fiji i save kisim ol kalabus lain long go pilai musik insait long ol komyuniti long taim bilong provinsal Yelo Ribon De.

“Long olgeta kalabus insait long PNG mi lukim ol kalabus lain i gat gutpela save na stail long pilai musik na singim song. Dispela kain save na laik long musik em i ken kamapim wanpela mak ol rot-bilong stretim ol man insait long haus kalabus,” Mista Simitab i tok.

Komisina bilong Koreksenal Sevis, Michael Waipo i tok dispela begpaip ben i kamap long rait taim long 40

ya independens eniveseri selebresen bikos em bai kamapim gutpela musik tru long yau bilong olgeta lain long taim bilong selebresen.

Koreksenal Sevis Paip na Dram i bin stat long 1967 long namba wan Infentri Pasifik Ailan Rejiment (1PIPR) Taurama Bareks. Em i bin kamap olsem wanbel tingting bilong PNGDF 1PIPR Dairekta bilong Musik, White Cross wantaim PNG Koreksenal Sevis Komisina Mista Purcell long 1PIPR Ben bai lainim ol Woda long kisim save long pilai Paip na Dram musik.

Long 1969 samepla memba bilong 1 IPIR Ben i bung wantaim nupela Ben Yuniti na em i mekim Koreksenal Sevis Ben Yunit i go bikpela moa.

Ol Paip na Dram i gat luksave long wol ausait na em i winim planti prais long ol resis bilong intenesenal Beg Paip long Australia na Yunaitet Kingdom long ol taim bipo.

CS Paip na Dram i gat bikpela wok long mekim insait long Koreksenal Sevis na long komyuniti. Em i save pilai long ol nesenal selebresen long Nesenal Kepital Distrik na long olgeta hap bilong kantri. Ol i save pilai tu long taim wan wan provins i save singaut long ol long ol provin-sal gavman de.

“Mi gat bikpela driman long dispela ben bai kamap bikpela na moa gutpela long bihain taim. Bihain long mipela wokim rivi bilong ogenaesen na strongim ben, dispela ben bai kisim moa man winim nau 24 memba namba i go long 100 long taim yumi bungim ya 2030,” Mista Waipo i tok.

Tasol long dispela ol gutpela musik paip na dram long stap gut, ben i mas stap long wanpela gutpela haus i gat ea kondisen, we nau ol i no gat.

Mista Waipo i tok gavman bai putim mani long lukautim ben tasol em i nidim olgeta lain long komyuniti long helpim long ol fanresing wok bilong kamapim mani bilong kirapim wanpela air kondisen haus bilong putim ol instramen gut.

“Mi laik askim tu ol ben memba long lukautim ol dispela instramen gut na bai ol tu i ken stap i go longpela taim moa long bihain taim. Yupela save yumi no save mekim ol dispela kain samting long kantri olsem na lukautim gut. Yupela mas kamapim nupela stail na putim lokal stail i go insait long mekim musik bai krai gut long yau bilong ol pipel.” Mista Waipo i tok.

NCC lonsim nupela buk



Dokta Simet na Dokta Park i holim nupela buk taim Nesenal Plening Minista Charles Abel i katim ribon long lonsim.

Aja Potabe i raitim

NESENEL Kalsarel Komis (NCC) na Inten-jibel Herites Senta bilong Infomesen na Komyunikesen (ICHCAP) bilong Saut Korea i lonsim pinis wanpela nupela buk long Fonde 10 Septemba long Pot Mosbi.

Nem bilong dispela buk em ‘Tredisenel Nolis na Wisdom: i kam long ol Pasifik Ailan (*Traditional Knowledge and Wisdom: themes from the Pacific Islands*).

ICHCAP i bin raitim dispela buk insait long tupela ya. ICHCAP i bin wokbung wantaim 6-pela Pasifik Ailan kantri long taim em i laik kisim ol infomesen long raitim dispela buk.

Dispela 6-pela kantri em ol Federetet Stets ov Maikronesia (FSM), Fiji, Palau, Papua Niugini (PNG), Tonga na Vanuatu.

Ol i bin wokbung wantaim long kamapim dispela buk projek wantaim pasin bilong rispekim wanpela narapela.

As tingting long kamapim dispela dispela wokbung na raitim dispela buk i bin kamap long wanpela sab rijonol netwok miting long Pot Vila, Vanuatu long Epril 2013.

Long dispela taim, ol dispela 6-pela kantri i bin bung long plen na toktok long raitim dispela buk.

Dispela buk i toktok long lukautim ol pasin tumbuna na kalsa long Pasifik Ailan rijon. Ol dispela 6-pela kantri i bin sainim wanpela agrimen

ol i kolim 2003 UNESCO Konvensen long lukautim pasin tumbuna na kalsa.

Ol wok ol dispela 6-pela kantri i bin mekim long raitim dispela buk i bin kamap bikos long dispela agrimen ol i bin sainim long ya 2003.

Minista bilong Nesenal Plening Charles Abel i bin lonsim dispela buk. Mista Abel em i ekting Minista bilong Kalsa, Ats na Turisim.

“Mi amamas long lonsim dispela nupela buk. Mi tok tenkyu long ol manmeri husat i bin bungim tingting wantaim na raitim dispela buk.

“Mi tok spesel tenkyu long 4-pela manmeri PNG husat i bin joinim ol narapela 33 moa manmeri long raitim dispela buk.

“Mi makim maus bilong gavman na tok tenkyu long ICHCAP na gavman bilong Saut Kore long helpim ol Pasifik Ailan kantri long raitim dispela buk,” Mista Abel i tok.

Mista Abel i tok pasin tumbuna na kalsa bilong yumi ol Pasifik manmeri em i wanpela namba wan pasin bilong yumi we olgeta de yumi save bihainim long pasin na laip bilong yumi.

Em i tok dispela buk bai apim nem bilong PNG na ol arapela 6-pela kantri bilong Pasifik.

Ol 4-pela manmeri PNG husat i bin raitim ol samting bilong PNG long dispela buk em Dokta Jacob Simet, Dokta Don Niles, Dokta Steven Winduo na Naomi Faik-Simet

CS Senia Non Komisen Opisa kisim trening

EKTING Deputi Komisina Kopret Afeas, Steven Pokanis i oppim wanpela indaksen trening bilong ol Koreksenal Sevis Non Komisen Opisa (NCO) husat i bin kisim promosen i no longtaim i go pinis, long kisim trening long wanpela mun.

Ol dispela senia (NCO) oppisa em i kisim renk bilong Saiden na Saiden Mesa (CSM). Namba bilong olgeta em 98 NCOs man na meri wantaim i kam long olgeta hap bilong kantri long ol i kisim wanpela rifresa trening long CS Trening Koles long Bomana.

Mista Pokanis i kisim ples bilong Komisina Waipo husat i stap long duti wokabout i go long AROB wantaim Komisina bilong Polis. Em i tok kongresulesens long ol oppisa na i tokim ol long senisim tingting bilong ol long wanem samting ol i save mekim bipo na ol i mas kisim nupela tingting bilong mekim wok we nau ol i kisim long dispela trening.

Em i tok, “Kisim promosen i go long narapela renk antap em i wanpela samting na long



Ol Senia Opisa husat i kisim promosen i sindaun long rifresa kos las wik long Bomana CS Trening Koles. Poto: CS Midia

mekim wok tru em i narapela samting olgeta.”

Em i tok moa long ol olsem ol i mas tingim olsem ol i bikpela senia opisa tru insait long wok ol i mekim olsem ol fran lain supavaisa. Ol bai wan wan taim i kisim ples bilong ol Komisen Opisa long wokples taim ol CO i no stap.

“Dispela trening em bai helpim yupela long luksave long wanem kain mak bilong wok i stap long renk yupela i bin kisim. Long wankain taim mi hop olsem yupela bai senisim pasin bilong yupela long wok taim yupela i pinisim dispela refresa trening,” Mista Pokanis i tok.

Trening em i bihainim wei bilong Queensland Koreksens Akademi kompetensi bes trening modul.

Dispela em ol namba tu hap bilong ol opisa long kisim trening; namba wan i bin kamap long mun Me na em i bilong ol Komisen Opisa.



U.S i helpim Hailans rijon

YUNAITET Stets Embasi i tokaut olsem U.S Ejensi bilong Intanesenel Developmen (USAID) Opis bilong Foren Disasta Asisten (OFDA) i givim \$100,000 long Intanesenel Ogenaisesen bilong Maigresen (IOM) long helpim disasta insait long Hailans rijon bilong PNG.

Taim hevi bilong 2015 inap 2016 El Nino i bagarapim ol komyuniti long PNG, ais i pundaun na strongpela san i bagarapim ol kaikai.

Dispela i mekim ol sampela pipel long sampela hap na Hailans

rijon tu long lukim kaikai i sot na ol i gat bikipela nid long wara, sanitesen na klinpela sindaun (WASH) program.

Oi rijonal edvaisa bilong USAID/OFDA wantaim ol disasta menesmen opisa, memba bilong Nesenel Egrikalsa Risets Institut, na ol wokman na meri bilong IOM i go long ol Hailans provins long lukim ol ples i bagarap.

Oi USAID/OFDA i lukim olsem ol hap i kisim bagarap long strongpela san na ais i pundaun i mas kisim planti helpim long kaikai, egrikalsa, na moa sapot long WASH

we i gat ol program long kamapim awenes long yusim ol seif rot bilong orait na putim gut ol wara bilong dring.

Gavman bilong U.S i gohet long wok wantaim gavman bilong PNG na ol non-gavman ogenaisesen (NGO) olsem IOM long givim ol kaikai long helpim na painim aut ol gutpela rot bilong helpim ol pipel i kisim bagarap long El Nino.

Oi i laik soim sapot na helpim long ol pipel bilong PNG husat i kisim bikipela bagarap long El Nino.

Wanpela man i makim IOM i lukluk long ol kaikai i bagarap long taim ais i pundaun.

Pik poket kamapim dai

Nicky Bernard i raitim

PIK Poket na pulim beg i kamap strong tru long Boroko na 4-mile insait long Pot Mosbi. Dispela i kamap dai long wanpela yangpela mangi Sentral taim em laik helpim susa bilong em.

Mada, nem bilong boi wantaim tupela susa bilong em i bin raun long 4-mile long Sarere namba 12 de bilong dispela mun Septemba. Taim ol tripela i go antap long ova het bris long go long Boroko, wanpela mangi i pulim beg bilong wan-

pela susa bilong Mada. Dispela i mekim Mada i paitim mangi ya na kisim beg gen.

Dispela stil mangi i singaut long ol wan lain bilong em na ol bung pait wantaim Mada. Wanpela bilong i kisim naip na sutim sait bilong Mada long lep sait bilong em. Dispela i mekim Mada long ran go long TST long 4-mile long kisim helpim tasol em no winim na em i dai long hap.

Mada, em bilong ples Barakau long Sentral Provins na em gat 20 krisman tasol, em pinisim yia 12 bilong em long Pot Mosbi Interna-

tional Skul long 2013. Dai bilong em i mekim planti bilong ol wan skul bilong i no inap long bilip olsem Mada i dai long strit pait.

Dispela dai bilong em i mekim ol Sentral ples lain i singaut long NCDC na ol polis long rausim ol-geta maket lain long 4-mile na Boroko bas stop. Oi tok dispela maket tasol save pulim planti ol stil mangi na pik poket lain long stap namel long ol lain i maket.

Oi singaut tu long ol pablik manmeri long gat rispek long ol Sentral lain long wanem dispela siti i stap long graun bilong ol.

Oi tok sapos ol gat rispek long ol-geta Papua Niugini manmeri kam long Pot Mosbi ol tu mas gat rispek long Sentral long stap long ples bilong ol.

Oi toktok strong nau long NCD Gavana long putim ol NCDC risev polis long wan wan ova het bris we em i wok long mekim. Oi tok planti ol ova het bris i gutpela tasol i mas gat risev polis bilong NCDC mas stap long putim was long ol pablik manmeri.

"NCDC risev polis save kisim pei long NCDC na wok bilong ol long

ranim ol buai lain em i no trupela wok. Putim ol was long ol ova het bris long ol lain save baim takis go long gavman na NCDC". Wanpela bilong ol Sentral i tok.

Oi tok tu olsem bipo ol save long ol miks manmeri bilong PNG long Pot Mosbi, nau em nogat, planti bilong ol em ol lain long Hailans tasol, na dispela nambis ples i kamap olsem Hailans ples.

Oi i tok bai ol toktok strong long ol memba bilong ol long rausim ol lain i no gat wok long go bek long ples bilong ol.

Ol wod i kisim Indipendens mani

Tony Sapan i raitim

OL 11-pela wod insait long 15 wod bilong Nimamar Lokal Level Gavman bai kisim K3, 300 wan wan long makim 40 yia bilong independens insait long ol wod bilong ol.

Foapela narapela wod i stap klostu long Londolovit taun em long Wod 1, 2, 11 na 12 bai istap insait long ol bung bilong makim independens insait long taun long independens de.

36 300 bilong dispela 11-pela wod Tumbawinlan Asembli i bin oraitim long Trinde 19 Ogas na ol i ting bai ol i baim i go insait long ol akaun bilong ol.

Tumbawinlam Asembli i bin oraitim tu K50, 000 bilong bikipela bung wantaim bilong makim independens insait long Londolovit taun em ol pipel bilong wod, wan tu eleven na 12 bai i kamap long en.

Nimamar LLG i save givim yet mani bilong makim independens i go long ol wod long taim i go pinis tasol em i save givim wan tausen kina long wan wan yia tasol dispela yia bai ol i givim K3,300 wan wan bilong makim independens bilong ol.

Wanem narapela mani bilong makim independens i kam long Nu Ailan Provinsal Gavman na Namatanai Distrik bai ol i skelim namel long ol bung bilong makim independens long Lahir Ailan.



Trafik opisa bilong RH Godens...

RAITMEN! Winim tru ol polis trafik. Man husat i security gad bilong RH long Godens i save smat tru long kontrolim ol kar i kam insait long mekim soping long RH Haipa Mart long Godens. Baga man bai sanap stret olsem ol soldia na han bilong em bai wok tasol long dairektim ol kar i kam insait o go aut. Em bai singaut bikipela tru long muvim kar hariap. Mi skelim, man bai kamap gutpela soldia o polisman sapos ol i rikrutim em. Gut wok bro! Gohet long gut wok bilong yu!

Poto: Jada Wilson

TVWAN na UOG i opim resis

YUNIVESITI bilong Goroka wantaim Digicel Play (TV WAN) i wok bung na opim namba tu piksa resis long Goroka bilong ol sekenderi na tseseri sumatin long Papua Niugini (PNG) long Septemba 8, 2015.

Het tok bilong dispela resis em, 'Digicel Beating Drums, Echoes of Change' long soim ol senis long komyunikesen we Digicel i kisim kam long PNG na long makim 40 yia Independens aniveseri. Dispela resis i op long olgeta sumatin long PNG namel long 18 na 25 krismas.

Husat i gat laik long joinim i ken kisim entri pepa na stori bot long fesbuk pes bilong Digicel Play o long Digicel stoa o kisim long websait bilong Digicel Play, www.digicelplay.com.pg. Ol bai kisim ol entri long Fonde 17 bilong Septemba inap Fraide 13 long Novemba.

Husat i gat intres i ken raitim wanpela sotpela storibot televisen edvetaismen long 30 inap 60 seken na kisim ol bikpela kalsa bilong komyunikesen long rot bilong bipo na ol rot bilong yusim dijitel na mobail teknoloji.

Namba wan resis i bin kamap gut stret long stat bilong dispela yia wantaim 7-pela wina i amamas long ol piksa long UOG.

Pastaim wina bilong *Get Connected* resis, Dominic Kalua i tok, 'Woksop i bin helpim mi planti. Mi lainim long kisim gutpela poto na putim long ol websait.' Ol narapela wina olsem Jasmine Simeon na Milka Akane i yusim gut save bilong ol long mekim skul wok. Milka i tok, 'Mi save long yusim ol kamera insait long ol studio long skul long mekim piksa

bilong ol presentesen.'

Dairekta bilong Senta bilong Sosol na Krietiv Midia long UOG, Dokta Verena Thomas i tok, 'Long trenim ol yangpela midia prodiusa taim ol i stap yet long skul mipela i larim ol long senisim ol save bilong ol wantaim ol poro bilong ol long skul na kamapim gutpela save long yusim midia namel long ol yet.'

Het long Maketing bilong TVWAN, Jack Bourke i tok, 'ol i bin amamas long ol risal bilong resis long las yia na bai ol i investim K75, 000 long dispela kempen gen.

Dispela 6-pela sumatin husat i givim gutpela storibot tru bai kisim nupela Smat Pon, tupela wik Wokim Piksa Woksop long UOG, tiket bilong go na kam bek na slip long nupela domitori bilong UOG na Samsung bai kamap olsem sponsa bilong ol.

Husat i win bai lain long mekim nius stori na advetais bilong ol televisen o TV taim ol i stap long woksop we bai kamap long TVWAN

Woksop bai kamap long Janueri 10 inap 24 long 2016.

Ol boding skul long Nu Ailan bai op yet

TAIM sampela ol boding skul i pas bikos long no gat mani bilong Tuisen Fi na strongpela san, ol boding sumatin long Nu Ailan provins bai no inap sot long kaikai.

Tenkyu long longtaim edukesen subsidi polisi bilong Gavana Sir Julius Chan na provinsal gavman bilong em.

Inap long 2008, olgeta boding skul wantaim ol vokesenel sumatin i save slip long skul long Nu Ailan i bin gat saplai bilong kaikai we Nu Ailan provinsal gavman i givim long mani mak

olsem K2 milien long wanpela yia.

"Long karimaut ol kaikai bilong ol skul, Provinsal Gavman Subsidi Yunit i luksave olsem ol skul i no inap pas bikos no gat kaikai bilong ol sumatin i save slip long skul," Sir Julius i tok.

"Mipela i save olsem mani bilong gavman i save afektim ol deliveri bilong skul fi long kantri. Tasol, mipela i mekim wantaim gutpela tingting long luksave olsem ol sumatin i no inap hangere. Dispela i bin polisi bilong gavman bilong mi long 7-

pela yia. Mipela save putim bikpela mani long kaikai bilong ol sumatin long skul," Sir Julius i tok moa.

Sir Julius i tok ol i mas redi long tem 4 long ol sumatin bai sindaun long eksem bilong ol long Gret 10 na 12.

Em i tok em bikpela samting olsem ol sumatin i mas gat kaikai na skul mas op. Em i tok ol i yusim K1.4 milien long kaikai bilong dispela yia. Em i tok ol i redim kaikai bilong ol sumatin bai ol i ken pinisim skul gut.

Andrew Meauri krismas bilong em 11 i bilong Biotou viles long Mekeo i pointim pinga i go long ol pipia nau i pulap long wara Inawabui na i opim dua long sik i kam klostu long ol pipel bilong Mekeo.

Inawabui Wara pulap long pipia

Moa long 600 bambam karamap we ol mama i tromoi i go long wara wantaim ol tin dring, botol, plastik kontena na klos wantaim ol narapela samting i bagarapim wara na i stap arere long wara.

I gat moa long 2,000 pipel bilong Biotou ples i save kisim wara bilong kuk, dring na waswas long dispela wara. Na long dispela kain pipia i mekim ol i kisim ol kain sik olsem join pen, pekpek wara, bel pen, skin hat na hetpen, long taim ol i dring dispela wara.

Lenona na wod kaunsila bilong wanwan ples i mas givim tok lukaut long pipel i go i kam long ol PMV o laik stop long bris bilong Inawabui long waswas o kisim wara long ol i no ken mekim bikos i gat bagarap i kamap pins. Dispela toktok i kam long Dokta R.GIREI



Sen Don Bosco skul kisim blesing

Sape Metta i raitim

OL papamama bilong ol gret 6 sumatin long Sen Don Bosco Nam – komyuniti skul insait long Uggai/Bena Distrik, Isten Hailans i bin amamas na selebret long taim ol bikman bilong edukesen i tok orait olsem, dispela gret 6 sumatin bai i ken i go het long skul long gret 7 long 2016 yia i kam bihain na gret 8 long 2017.

Dispela tok orait i bin kamap bihain long skul bod, het masta na ol tisa wantaim ol papamama i bin tok kros olsem taim ol sumatin i save pinisim gret 6 na i go aut long ol arapela praimer skul, ol i save kisim taim long ol abius pasin em ol spak na drag lain i save kamapim long ol.

"Mipela i save kisim planti ripot nogut long skul long ol pasin nogut i save kamap long ol skul pikinini meri bilong mipela long taim ol i go i kam long skul i stap autsait long komyuniti bilong mipela," hetmasta Casper Ruarry i tok.

Em i tok em i amamas olsem dispela ol pasin bai i no nap kamap nau, long wanem ol sumatin bai i ken i stap bek na go het long skul long komyuniti bilong ol yet.

Skul bod siaman Utix Nagamie i skruim tok i go moa na tok ol komyuniti we i stap long skul eria i save i stap long planti hevi bilong traibel pait. Dispela i mekim na skul i no save ran gut. Sampela taim skul i save pas tu long taim hevi bilong pait i kamap. Tasol dispela ol hevi em

samting bilong ol taim i go pinis na stat long 2011 wantaim helpim bilong Katolik Sios Goroka Daiosis, skul i kirap na ran gut i kam inap nau long dispela yia.

Daiosis i bin helpim na sapotim skul wantaim ol bilding materiel we skul i kamapim wanpela nupela klasrum na haus slip bilong ol tisa.



St. Don Bosco skul...

Bisop bilong Goroka Francesco Sarego i blesim nupela klasrum long St. Don Bosco Nam komyuniti skul long Uggai/Bena Distrik, Isten Hailans. Bihain long kisim blesing-komyuniti skul i kamap level 4 praimer skul, long wanem, em i go antap long level we em bai gat gret 7 na gret 8 long 2016 na 2017. **Poto: Sape Metta**

Asaro lidaman amamas long developmen

Sape Metta i raitim

ASARO em i wanpela ples we i gat nem long Isten Hailans, Papua Niugini na wol tu. Na long wanem as na dispela nem Asaro em i save pairap?

Em i wanpela bikpela askim, na sapos wol i ken save long dispela nem, ol pipel bilong dispela ples i ken paitim bros na tok, EM MIPELA ASARO YAH! Watpo na ol i ken tok blsem? Em bikos ol graun man (Asaro Mudmen) i bilong dispela ples. Sapos dispela ol graun man i ken bringim Asaro i go long wol, em i laik bringim narapela developmen bihainim graun man i go antap long wol mep tu.

Wanpels seremoni bilong brukim graun i bin kamap long Asaro stesin long Septemba 25, 2014. I no long taim wok bai pinis long dispela projek na ol manmeri na pikinini long Asaro Daulo distrik tu bai i ken kisim sevis long en.

Dispela projek em i Daulo Distrik Rurel Helt Senta we KOICA o Korean Aid i tok orait na bringim i go long ol pipel bilong Asaro na Daulo distrik long Isten Hailans.

“Tasol kain developmen em i no map kamap sapos wanbel tingting na pasin i no stap. Pasin bel isi, wanbel long gutpela tingting, yuniti na pasin bilong wok bung i save kamapim gutpela kaikai. Na dispela ol pasin i mas kamap long gutpela bilong ol manmeri na pikinini.”

Dispela em sampela toktok papa graun na viles komyuniti lidaman Elvy Gunure Oreke i mekim long taim *Wantok Nius* i go lukluk raun long projek senta long Asaro stesin long wik i go pinis.

Oreke husat i gat bikpela laik tru long helpim ol pipel long ol hauslain, viles, distrik na provins i tok, long bringim kain bikpela dona ejensi olsem KOICA long go na kirapim helt long Asaro na Daulo distrik em i no isi. Tasol pasin bilong wok bung long paitim toktok, stretim ol pepa wok na kisim i go i kam long Korean Embasi long Pot Mosbi i mekim na wok developmen

bilong helt senta i kirap na kamap long Asaro.

“Dispela em i bikpela laik na driman bilong mi long taim mi lukluk na i gat strong yet long mekim ol samting. Wanpela long dispela ol samting em dispela rurel helt Senta we bai i ken givim gutpela helt sevis i go long ol pipel long distrik na provins,” Oreke husat i gat klostu long 60 krismas i tok.

Em i tok, nau yet em i amamas long lukim olsem ol wokman bilong Korean bilding konstraksen kampani em MIDAS na ol lokal bilda long Daulo i wok strong nau long bildim na kirapim helt senta.

Tasol wanpela samting em i no amamas long en, em tok promis em Praisin Minista Peter O’Neill na

mekim wei long haus sik projek bai kirap long graun bilong mipela. Nau yet mipela i wetim peimen na olsem man i go pas long 20-pela famili bilong mi long Nipuka Klen, mi mas askim nau Mista O’Neill na gavman bilong em long stretim na givim peimen long mipela na mipela i ken kisim bel isi, sindaun gut na lukim haus sik projek i kirap, operet na givim sevis long gutpela bilong ol pipel long distrik na provins,”



Papa graun na viles komyuniti lidaman long Asaro long Daulo, Elvy Gunure Oreke husat em pablik rilesens (PR) opisa bilong Midas bilong konstraksen kampani i sanap long poto a soim nupela Daulo distrik rurel helt senta bilong em KOICA i helpim na kirapim long K15 milien. Ol poto: Sape Metta



Long taim komyuniti helt woka Magdalene Gahan sevim sik mangi, Stanley Thomas na mama bilong em Kila Thomas long Asaro Helt Senta long Daulo distrik. Senta bai senis na Tera wantaim ol wanwok bilong em bai muv i go long nupela Daulo Distrik Rurel Helt Senta long stat bilong 2016 yia i kam bihain.

gavman bilong em i mekim long luksave na baim ol peimen long graun em helt senta i kirap long en.

“Wanpela krismas em i kamap pinis nau, na Mista O’Neill wantaim gavman bilong em i no onarim komitmen o tok promis bilong em. Mipela ol papa na mama graun aninit long Loheka hauslain bilong Nipuka Klen i wanbel na muvim ol haus na gaden bilong mipela long

Mista Oreke i tok.

Opisa i go pas o OIC bilong Daulo Distrik Helt sevis.

Jack Kuntin i skruim sampela toktok i go moa na tok em i gat bikpela amamas tru long gavman na ol pipel bilong Korea long makim Asaro na Daulo distrik long kirapim dispela helt senta projek.

Em i tok dispela projek em i olsem riwot o pe bilong ol gutpela

hatwok na pefomens em Asaro na Daulo helt senta i kamapim long 2012 i kam antap long 2014.

“Mi laik tok amamas na tenkyu long olpela Sif Eksekutiv Opisa (CEO) bilong Isten Hailans Provinsal Helt Atoriti (EHPHA) Ben Haili husat i bin wok hat tru long toktok wantaim Nesenel Dipatmen ov Helt, Korean Embasi na ol arapela bosman na meri long

distrik na provinsal level long kisim tok orait long bungim projek na kirapim helt fasiliti long Asaro na Daulo distrik,” Mista Kuntin i tok.

Em i tok, long 8-pela distrik long provins, Daulo distrik i go pas long givim namba wan helt sevis i go long ol sik lain, mama karim na eksiden na emejensi sevis tu.

“Mipela i stap arere na klostu long bikpela Okuk haiwe, taim eksiden i save kamap, ol i save bringim ol lain husat i save painim hevi i kam long mipela na planti taim mipela i save sevim laip bilong ol,” Mista Kuntin i tok.

Em i tok senta em i go pas long en em Asaro Helt Senta we i bin kamap aninit long Australia gavman long 1965. Na bihain long 50 yia, dispela senta bai senisim nem i go long Daulo Distrik Rurel Helt Senta we bai statim operesen long stat bilong 2016.

Mista Kuntin i tok em i amamas tu olsem bipo long senta i op, gavman bilong Korea bai salim ol trena i kam long Daulo distrik Helt Senta long givim trening long ol helt woka husat bai kisim gut save long wok bilong ol long senta. Helt sevis i go long ol pipel bilong distrik, provins na PNG tu. Na bikos em wol klas helt fasiliti, em bai putim Asaro wanpela moa taim i go long wol mep, wankain olsem ol graun man bilong dispela ples.

Sevaikel Kensa i stap namba wan long kilim ol meri

Toktok i kam long PNG Institut of Medikal Risets

Sevaikel Kensa em ol i save tok olsem em i wanpela bikpela kain kensa long ol meri long planti hap bilong ples graun.

Ol ailan kantri long Melanesia i stap antap tru long mak bilong ol meri save kisim sik sevaikel kensa na long mak bilong ol meri save dai long dispela sik, insait long wol.

Long Maikronesia i no longtaim i go pinis ol i painim aut planti meri gat sevaikel kensa wantaim planti i stap long las hap bilong sik we i winim bodi pinis.

Bikpela namba bilong ol sevaikel kensa i save kamap long ol strongpela sua o sik i kamap long ol hap bi-

long ol sem bilong ol man na meri wantaim binatang, human papillomavirus (HPV).

I gat moa long 120 kain HPV tasol HPV 16 na 18 em i save kamapim 70 pesen bilong ol sevaikel kensa long olgeta hap bilong wol.

Ol sevei bilong HPV namel long ol meri insait long planti kantri i soim olsem bikpela infeksen i stap long ol meri i aninit long 25 krismas.

Ol gutpela wok painimaut i tok olsem PNG em i stap namel long ol kantri we i gat bikpela namba bilong sevaikel kensa long wol. Klostu olsem 1,500 meri i save dai olgeta yia long PNG wantaim sevaikel kensa.

Ol strongpela marasin (vaksin) nau i stap i gat HPV kain 16 na kain 18 na ol i gat pawa long daunim tru hevi bi-

long ol sik sevaikel kensa i save kamap wantaim HPV long PNG sapos rot bilong givimaut i kamap gut wantaim gutpela mani long ranim program.

I gat ol gutpela save i stap olsem sapos ol yangpela meri i kisim banis sut o marasin pastaim long ol i kamap long mak bilong slip wantaim man, em inap long daunim ol namba bilong ol lain i save kisim binatang bilong HPV long kamapim sevaikel kensa.

Wok bilong stopim Sevaikel kensa em i bikpela samting tru, tasol ol program bilong ol wok bilong stopim na pasim sik i no inap yet. Tupela bilong 21 kantri na teritori i winim pinis mak bilong wokim sevaikel kensa skringing moa long 40 pesen.

Na 10-pela bilong 21 kantri na teritori i kisim HPV vaksinesen i go insait long imunaisesen taim tebol bilong ol, tasol tupela kantri i gat ripot olsem ol i karamapim pinis 60 pesen bilong kantri pinis wantaim HPV vaksinesen.

Ol rot blok bilong pasin HPV vaksinesen em ol kain samting olsem: i no gat inap mani long saptim vaksinesen long olgeta taim, gavman i no gat kliia plen bilong givim tok orait; (iii) Bikpela samting long ol pablik i lukim gutpela bilong HPV vaksin olsem em i seif o no gat; na (iv) i no gat kliia gaidlain na polisi bilong HPV vaksinesen.

Ol wok we nau i stap long traim long stopim sevaikel kensa insait long Pasifik Rijnon em i no inapim mak bilong hevi we dispela sik i kamapim long hia.

Lukluk long rijon, em ol i mas daunim ol prais bilong baim ol marasin long bikpela kago, teknikal saptim bilong mekim wok bilong stopim kensa, operesenel risets na edvokesi na long strongim wok bilong politik long saptim wok bilong stopim sevaikel kensa na long stopim birua long planti meri long Pasifik.

Ol dispela toktok i kamap long risets pablikesen, ‘Mepim HPV Vaksinesen na Sevaikel Kensa Skringing Wok insait long Pasifik Rijnon Strongim Nesenel na long Stopim Rijnonal Sevaikel Kensa 2015 na long PNG Medikal Jenel pepa bilong ‘Kisim mak bilong bosim sevaikel kensa long Papua Niugini: wanem ol bikpela tingting bilong risets na program

Ol meri i soim PNG stail

Esther Bralyn Wani i raitim

“FOREN Afes opis i bin laikim dispela so long soim ol meri bilong ol praim minista na presiden bilong ol Pasifik Ailan kantri ol dispela at na kraf maket,” Dairekta bilong Wimen insait Bisnis (WIB), Janet Sape i tok.

Misis Sape i tok tenkyu long City Pharmacy Limited long givim dispela eria. Em i tok ol bai mekim long 5-pela de inap Independens de.

“Bikpela senis i kamap long gavman bilong mipela tasol i bin gat planti salens tu, ol meri bin mekim wanem samting ol i ken mekim. Ol pastaim lida i bin mekim wanem ol i inap long mekim,” Misis Sape i tok.

Em i tok planti skul toktok i bin kamap long ol meri, WIB i bin toktok na mekim wanem samting ol i ken mekim na ol i bin wok wantaim gavman. Em i tok ol i lukluk nau long neks 40 yia.

Long wankain taim, wanpela meri i bin kam long dispela so long salim ol flawa we em i save lainim gut na bilasim ol haus, hotel o haus lotu.

Beta Andrew bilong Isten Hailans provins.

Planim plawa na salim i no intres bilong em tasol em i



Beta Andrew bilong Isten Hailans provins salim ol kalaful flawa. Foto: Esther Wani

save amamas long planim flawa na bilasim haus lotu.

Em no kisim skul long em tasol em lain long lukim ol piksa na sekim long intanet.

Em i bin statim bisnis bilong em taim em i save go putim plawa long haus lotu na taim em lukim olsem planti meri i kisim plawa kam long sios. Ol pipel i lukim olsem haus bilong em i pulap long plawa na ol i askim em long saplaim ol sios.

Ol sios i save baim flawa long em na bihain ol narapela lain tu i save laik long baim

flawa long em. Bihain long dispela, em i statim liklik bisnis bilong em.

“Nau mi lukim olsem flawa i gat mani bilong em i stap, em i kisim mani bilong kaikai na em i helpim mipela planti long sapotim famili. Mi no save wetim potnait, ol man save laik selebretim ol samting long kainkain taim em mipela i save saplaim,” Misis Andrew i tok.

Em i maket nau long 7-pela yia, tasol no gat gutpela maket yet long ol plawa bilong em. Ol i save bung na maket aninit

long PNG Kat Flawa Asosiesen we ol i kolim flawa muvmen na em i save kamap long wanpela taim insait long wanpela krismas long Ats Tiata.

“Sapos gavman i ken luksave long mipela na mekim wanpela maket olsem ol maket bilong kaikai na mekim maket bilong ats na kraft na floriskalsa bai mipela ken sindaun na mekim ol maket bilong mipela. Dispela bai helpim mipela gut tru,” em i tok.

Meri winim skolasip long pailot skul



Mis Weminbarre i sanap long namel wantaim, Kerenga Kua sanap long sait bilong em, (Lephan), Sif Eksekutiv Opisa bilong Air Niugini, Simon Foo long sait (raithan) na ol narapela bikman bilong Air Niugini.

Dikaiyos Weminbarre long taim bilong sainim ol pepa.

Esther Bralyn Wani i raitim

MEMBA bilong Sinasina Yogomulg, Kerenga Kua i wok bung wantaim Air Niugini na kamapim wanpela skolasip program bilong ol yangpela sumatin husat i gat intres long kamap pailot.

Air Niugini Sinasina Yogomulg Pailot Kadet Program em dispela skolasip program we Mista Kua i kamapim taim no gat planti pailot long ples bilong ol.

Long dispela em i wok bung wantaim Air Niugini long baim skul fi bilong ol sumatin husat i aplai. Air Niugini i bin givim tes long olgeta sumatin husat i aplai na wanpela i mekim gut bai gat sans long go insait long pailot skul na kamap pailot.

Insait long ol dispela tes, wanpela meri, Dikaiyos Weminbarre, tasol i mekim gut namel long 58 narapela.

Mis Dikaiyos i pinisim Basela bilong Sains wantaim Kompiuta Sains long Yunivesiti

bilong Papua Niugini 2012. Em i wok wantaim Datec long tupela yia na nau bai em go long pailot skul.

“Mi tok tenkyu long menesmen bilong Air Niugini long sapotim dispela program. Mi bilip olsem dispela program bai helpim mipela na kantri wantaim,” Mista Kua i tok.

Long wankain taim, Sif Eksekutiv Opisa bilong Air Niugini, Simon Foo i tok, dispela wok em bilong yusim het. Yu mas gat bikpela save

na kisim A na B long ol mak bilong yu long stap insait long ol seleksen.

“Long kamap pailot em driman bilong mi long wanem ankel bilong mi, Kepten Kora Wemin em pailot tu. Mi amamas long Mista Kua na Mista Foo bilong Air Niugini long sapotim mi long dispela program,” Mis Weminbarre i tok.

Em tok em bai traim long mekim gut long skul na kamap pailot.

Kontrasepsen SR. Lorena Jenal

Famili husat i save pre wantaim i save stap wantaim

STRONGPELA famili laip i save strongim sios na kantri. Manmeri i save kamap long famili long wei sios i save skulim bipo ol pipel nau na bihain tu. Sapos yumi bihainim dispela tingting, bai i gat kwestin i stap?

Kontrasepsen i soim pasin bilong laikim na wanbel pasin tru tru, o em i bihanim mi pasin tasol? Kontrasepsen i skulim man na meri long kisim amamas tru long joinim tupela bodi i kamap wanpela tasol, o em i save kirapim skin nating na trikim em yet long amamas long skin tasol? Kontrasepsen i save helpim tupela marit i tras na bilip ful long wanpela na arapela, o i helpim tupela long kalap nating long kain kain bodi na kisim kain kain sik?

Plenti bai i kirapim kwestin long mi olsem: sios i laikim ol meri bai i karim 15 pikinini olsem?

Sios i no askim ol marit lain i karim plenti pikinini. Sios i askim ol long karim namba long pikinini, tupela papa mama i ken lukautim gut tru; long kaikai sait, helt sait, na skul sait, na gutpela sindaun, long taim ol i pikinini yet na inap long taim ol i kamap manmeri na i sanap strong long ol yet.

Dispela taim ol i kisim gutpela tinting olsem manmeri tru. Tru tumas sios i tok nogat long kontrasepsen, tasol em i no tambu long spesim, na avoidim pikinini, nogat tru. Sios i givim skul long responsibel Parenhut (papamama i gat tingting i stret tru) na save yusim NFP: “Natural Famili Plening”.

Yumi olgeta i save gut tru, ol meri i no save kisim bel olgeta de na olgeta taim ol i save slip wantaim man, nogat. Meri i gat sampela de long olgeta wan wan mun long kisim bel. Nogut yumi paol wantaim olpela wei, ol i save yusim long spesim, o stopim pikinini, long bipo.

Trupela wei long bipo i hat long ol meri i wok hat long gaden na bus na haus wantaim. Nupela wei em isi na bai ol meri i save gut long bodi bilong ol. Dispela wei em i save wok gut tru long meri i skul gut tru long wanem kain wei bodi bilong em i save wok na pilim olgeta liklik na bikpela hevi i save kamap long em, moa yet long ol hevi samting olsem wari o sik o spak o arapela bagarap.

Meri husat i kila gut na i mekim samting, na man i yesa na tupela i wok bung wantaim na pasim tok gut tru, NFP i gat 99%, sekuriti. Sampela taim tupela i no gat wari long mani na kain kain arapela problem marasin i save givim ol meri. NFP i no kostim moni na nogat bagarap i hait na kamap.

Em i wanpela gutpela wei tu long helpim ol marit i laik kisim pikinini tasol pikinini i no save kamap. Wanpela bikpela samting meri i mas save kila tru em wanem de long olgeta mun em i ken kisim bel na wanem ol de i no gat. Dispela save tu em i helpim meri long painim aut hariap taim em i gat sik long bel na nidim marasin.

Plenti taim mi yet mi lukim long family wok na family visit; God em i namba wan dokta na tisa na saveman tru. Bodi bilong ol meri i no save karim pikinini tasol. Bodi bilong ol meri i gat kain kain taim insait long wan wan mun na em i no wanpela masin tasol - bodi bilong man na meri wantaim em i wanpela mirakel.

Plenti manmeri insait long sios tu ol i gat kros long sios i laik bosim ol na stilim fridom bilong ol, moa yet fridom meri i gat long bodi bilong en. Tasol dispela kros na tok i bikpela giaman kontrolim bodi long gutpela wei na larim bodi i ken kamap presen em i skul bilong sios. Man na meri i piksa tru bilong God na bodi bilong tupela i soim digniti na dia tumas long ai bilong God.

Plenti taim Kontrosepsin i no save tokaut long samting em i trupela na l spesol tru. Plenti taim dispela olgeta kain kain wei na tok i go long Kontrasepsen i sut long giaman fridom na giaman seks long wanem responsibiliti na fridom tru i no stap. Fridom tru yumi skulim long disiplin long pasim tok na kain kain we long respek na trupela rait long wanpela narapela.

Bilong wanem na seksual vailens na SDT i go antap moa yet? Bilong wanem na skulmeri i panim kain kain sik na bilong wanem rep i save kamap long plenti marit lain?

Rep na vailens i soim aut fridom o kain kain problem i save brukim sosaiti na marit? Long wanem ol nupela stadi i sut i go long mani na pawa na seks na karim kaikai long raskol pasin i stap long rot? Olsem wanem? Ol strit pikinini ol i gat gutpela papamama na i kamap long rot o wanem?

Mi no bilip long wanpela hap bilong graun kontrasepsen i save mekim ol meri i stap fri. Sapos marasin i kontrolim bodi bilong meri, digniti na fridom i stap wei? Yupela yet i skelim.

Mi autim tingting na bilip bilong mi wantaim rait na respek na responsibiliti bilong mi long ai bilong God.

Tenkyu tru na God bless.

SR. Lorena Jenal

Mi selebretim independens

Pater Paul Liwun i raitim

MI bilong kantri Indonesia. Mi kamap long Papua Niugini long yia 1990 - 15 yia bihain long Papua Niugini i kisim Independens.

Olsem wanpela yangpela misineri, superia bilong SVD long PNG i salim mi go mekim wok long Enga Provins. Mi lusim Enga long 1998 na mi kam wok insait long NCD inap nau.

Dispela yia bai mi stap 26 yia long PNG na 26 taim nau mi bihainim na selebretim Independens de bilong Papua Niugini.

Tasol long 9-pela yia mi stap long Enga, mi no pilim na mi no lukim manmeri bilong ples i selebretim Independens. I nogat plak reising. Olsem sios, mipela i wokim misa long selebretim Independens.

Mi askim ol, bilong wanem yumi i no inap selebretim Independens wantaim? Ol i bekim askim bilong mi: **"Gavman i no givim mani na bai yumi selebretim olsem wanem?"**

Dispela bekim i mekim mi kirap nogut. Kantri PNG i no bilong gavman. Yumi stap na PNG i stap. Gavman i kamap bihain. Gavman i stap long helpim yumi long developim dispela kantri. Long dispela bekim bilong ol tasol, mi inap long save olsem, manmeri bilong ples i no klia long tru long mining bilong Independens.

Sampela i tok, **"westim taim long selebretim, bikos gavman i no givim mipela kaikai. Moabeta mi wokim gaden bilong mi, o salim kaikai long maket, pilai kas na dat (liklik spia) bai mi winim mani long baim kaikai bilong mi. Olgeta de bai mipela kaikai kaukau na kumu bilong gaden. Bilong wanem yumi selebretim Independens? Sapos Gavman i givim mani, bai yumi selebretim"**.

Dispela kain toktok mekim mi tingting planti. Manmeri i save klia



Hiri dancer: Ol yangpela meri bilas long tumbuna bilas na danis long selebretim 40 yia independens.

long mining bilong kantri o nogat? Independens? Gavman? Pipel bilong PNG?

Selebresen long Siti.

Taim mi stat wok long Erima, pastaim tu mipela i gat Misa/Lotu tasol na manmeri i go nabaut, nabaut. Tasol i no gat planti manmeri i kam long Lotu. Bihain long tupela yia mi stap long Erima, mi tromoi sampela tingting long selebretim Independens wantaim insait long Peris.

Mi save olsem long Pot Mosbi i gat wanpela bikipela selebresen i save bungim planti manmeri long Independens de ol i kolim **HIRI MOALE**. Olsem na taim mi tromoi tingting bilong mi long selebretim long Peris, planti i tok, **"Yumi gat Hiri Moale pinis ya?"**

Na bihain mi bekim: **Em i tru, yumi gat Hiri Moale. Tasol sapos yumi go long Hiri Moale, yumi bai danis na singsing wantaim ol**

o nogat? Hiri Moale Komiti bai givim yumi kaikai na drink tu ah? Nogat yah? Yumi go long Hiri Moale, yumi sanap na lukluk tasol. Yumi i no selebretim. Yumi long Erima i kam long olgeta kona bilong PNG. Bilong wanem yumi no inap selebretim wantaim?

Mipela traim namba wan taim. Bihain long Santu Misa mipela i pilai kain, kain gem olsem volibal, basket, soka na pulim rop (Tag of war). Planti i kam na selebretim wantaim.

Narapela yia mipela selebretim wantaim kaikai. Wan wan rijon (Papua, Momase, NGL na Hailans) na mipela i baim pik na kukim na selebretim wantaim. Bihain long Santu Misa insait long sios, olgeta i bung long fran bilong Haus Lotu na wokim plak resing wantaim.

Bihain long plak resing mipela i bung insait long haus bung na selebretim wantaim kaikai na danis bi-

long tumbuna. Olgeta rijon bai bringim danis bilong tumbuna bilong ol. Long prisenim danis tumbuna, mipela i makim kwin bilong St. Peter Chanel.

Olgeta yia mipela i wokim olsem na haus Lotu i save pulap na manmeri i amamas long selebretim wantaim.

Bikos mipela yet i danis na wokim kai kai olsem na planti i pilim tru olsem tru mipela i selebretim Independens bilong mipela.

Nau mi stap long Hanuabada, asples bilong Hiri Moale. Olsem na mi no wokim planti tumas. Mipela i wokim Misa bilong Independens na go nabaut long Hiri Moale.

Mi bin stori long ol, wanem samt-ing mipela i wokim long Erima. Olsem na long yia namba tri, sampela man i go pas long ogenaisim sampela samt-ing bihain long Misa.

Pastaim ol i wokim babakiu na kaikai tasol. Long namba tu yia i gat

spot pilai na kaikai.

Long namba tri yia mipela i gat kaikai na laip ben, tumbuna danis na moden danis. Manmeri i amamas bikos ol yet i selebretim Independens.

I no wetim Gavman long givim mani. Nogat. I luk olsem manmeri bilong Pot Mosbi i save klia long mining bilong Independens na mining bilong kantri.

Olsem na ol i no surik long selebretim wantaim.

Long selebretim Independens wantaim narapela manmeri bilong narapela provins inap long kamapim yuniti, na wok bung wantaim.

Bikos PNG em YUMI YAH!. Sapos yumi save gut long narapela, narapela, yumi bai kamapim gutpela wok bung wantaim. Long dispela we tu yumi inap long tingting long narapela-narapela.

Bikos PNG EM MI YAH!



Fr. Paul wantaim ol kongrigesen bilong Hanuabada werim PNG siot na kisim piksa long independens de selebresen. Photos: St. Michael's Parish, Hanuabada.



Tag of war - Ol meri pulim taitim rop.



KOMENTRI

Skelim gen tingting long givim nating fri edukesen long kantri

Ol amamas bilong 40 yia bilong independens i pinis nau na yumi lukim gen sampela wok gavman i laik stretim hariap bipo long dispela yia i pinis. Wanpela bikpela hevi i bin kamap long ol skul inap sikispela mun nau em wari bilong mani. Gavman i no hariap long givim hap mani bilong subsidi o Tuisen Fi Fri (TFF) na planti skul tru i kisim taim. Sampela bilong ol dispela skul i mekim strongpla toktok long pasim skul na salim ol studen i go bek long ples. Bai ol i larim ol gret 10 na gret 12 tasol i skul inap eksam bilong ol i pinis na skul i pas olgeta.

Sampela skul i pasim skul long dispela mun. Sampela boding skul salim ol studen i go holide na tokim ol long stap long haus na kam skul long de na go bek long haus bilong ol. Ol papamama i wari tru long ol pikinini tasol bai ol i mekim wanem. Olgeta samting i pas long han bilong nesenel gavman.

Orait long dispela wik, nesenel gavman i tokaut olsem mani bilong ol skul i stap aninit long Nesenel Edukesen Sistem i redi na long dispela wik bai ol i stat long kisim dispela TFF bilong ol. Dispela em i gutpela nius tru long ol skul na ol papamama.

Seketeri bilong Edukesen i tokaut olsem gavman i givimaut K53 milien i go long 10,325 skul. Dispela mani bai helpim moa long 1.9 milien studen stat long elementeri skul i go inap long ol voke-senel skul. Dispela mani em i las

hap bilong K471,809,310.08 fri edukesen mani bilong dispela yia.

Long dispela yia, gavman i bin makim K605 milien long dispela fri edukesen program bilong en. Ol i brukim mani i go long tupela hap. Namba wan hap mani o Payment 1, i karamapim Tem 1 na 2. Namba tu hap o Payment 2, i karamapim Tem 3 na 4. Gavman i tokaut olsem dispela mani ol i givimaut nau i karamapim mani ol i no bin givimaut long Payment 1 na Batchment 2 bilong Payment 2. Na bai ol i skelim yet mani ol skul i no bin kisim long Payment 2.

Dispela mani gavman i givimaut long skulim ol pikinini bilong yumi em i bikpela mani tru. Seketeri bilong Edukesen i tokim ol skul het tisa na prinsipel wantaim ol skul bod long yusim gut dispela mani. Em i tok dispela mani i bilong helpim ol studen i stadi na redi gut long sindaun long eksam bilong ol long Tem 4.

Ol toktok bilong edukesen seke-teri i gat gutpela as long en. Oltaim yumi harim stori bilong ol skul i no yusim gut mani, o ol skul bod i paulim mani o sampela giaman skul i kisim mani. Dispela kain pasin i mas pinis nau. Edukesen em i bikpela samting na yumi olgeta i laik lukim ol pikinini i skul gut na kisim gutpela save. Sampela skul i no gat bod miting bilong ol na ol papamama i no save skul i yusim dispela mani olsem wanem.

PNG i sot long planti samting yet. Edukesen i kisim helpim long TTF polisi bilong gavman. Helt tu i kisim sampela bikpela helpim. Long eria bilong edukesen, yumi



lukim ples klia olsem TFF i mekim planti papamama i les long mekim ol wok bilong helpim skul. Ol i lusim olgeta samting long han bilong ol tisa na gavman. Dispela kain pasin tu i mas senis.

Gavman i mas luksave pinis long ol hevi i kamap aninit long TTF polisi. Na moa hevi i kamap long taim gavman i stopim projek fi. Dispela i givim moa hevi long ol skul husat i gat program bilong ol

long kamapim gut skul bilong ol pikinini. Sapos i no gat projek fi bai i no gat projek i kamap. Yumi lukim ol hevi dispela tambu i kamapim long planti skul long dispela yia.

Kantri i sot long mani. Ating i gutpela sapos gavman i ken larim ol papamama i baim projek fi long neks yia. Projek fi i bikpela samting long helpim gutpela skul envairomen bilong ol pikinini i lainim gut ol samting. Dispela mani i

helpim ol tisa na prinsipel i kamapim gutpela program bilong ol skul. Na em i helpim ol papamama tu long luksave olsem ol tu i givim han long strongim edukesen bilong ol pikinini bilong ol.

Em i taim bilong skelim gen tingting na tok stret sapos dispela fri edukesen polisi i helpim tru ol pikinini bilong yumi long bihain taim bilong ol o nogat?

Gavman bai helpim manmeri kirapim bisnis

Aja Potabe i raitim

PRAIM Minista Peter O'Neill i tok gavman bai givim moa sans long ol yangpela manmeri long dispela kantri long mekim bisnis na kamap ol bisnis manmeri.

Em i mekim dispela toktok las wik Trinde taim em i toktok long namba 40 independens de bilong PNG.

"Dispela i ken kamap aninit long liklik bisnis entaprais. Ol pipel bilong Papua Niugini i fit long mekim bisnis bikos yumi save laik long gat bisnis bilong yumi yet," Mista O'Neill i tok.

PM O'Neill i tok gavman bai kirapim ol sans o opotuniti long larim ol manmeri i mekim bisnis na

kamap bisnis manmeri.

"Bai mipela i kamapim planti sans long mekim bisnis. Kantri bilong yu na gavman bilong yu i redi long helpim yu kamap bisnis manmeri.

"Gavman bai mekim wok bilong en long larim ol rot bilong mekim bisnis i op. Dispela bai larim ol pipel i statim bisnis isi.

"Gavman i salensim ol yangpela manmeri long mekim turis na marasin bisnis.

Bai mipela helpim ol manmeri husat sanapim pinis ol bikpela bisnis insait long kantri.

"Ol dispela kain bisnis i wok long kamapim moa wok mani. Dispela i helpim ol manmeri long kirapim ikonomi bilong dispela kantri," O'Neill i tok.

Praim Minista i tok PNG em i wanpela gutpela kantri long mekim bisnis. Em i tok ol bikpela intenesenel binis i luksave long PNG olsem wanpela gutpela kantri long mekim bisnis.

"Gavman i wok long kamapim gutpela samting long larim moa bisnis i kamap long dispela kantri. Mipela i senisim sampela olupela lo we i bin pasim moa bisnis long kamap.

"Gavman i daunim mak bilong takis mani em i save kisim long ol bisnis. Dispela kain ol samting i wok long mekim kantri bilong yumi wanpela gutpela kantri long kamapim bisnis.

"Plantil ol biknem kampani i wok long kam insait long PNG na

sanapim nupela bisnis.

"Dispela i soim olsem ol i gat strongpela bilip long gavman na ol i laik wok bisnis wantaim yumi," Mista O'Neill i tok.

Tasol em i laikim ol manmeri PNG yet long no ken sanap nating na lukluk long ol arapelapa manmeri i kirapim bisnis.

"Mi laikim planti manmeri long kirapim ol bisnis. Ol pipel yet i mas kirapim bisnis na groim wanem kain liklik bisnis ol inap mekim.

"Ikonomi bilong kantri i stap long han bilong ol manmeri bilong yumi. Ol i mas wok gut, mekim bisnis gut na kamapim gutpela sindaun long ples," Mista O'Neill i tok.



Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Websait: www.wantokniuspepa.com

Pe bilong wanpela yia, 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.



Hamas asailam sika bai ol kantri kisim

OL Yuropian Yunien (EU) kantri i wanbel long wanpela dil long putim 120,000 asailam sika long ol kantri long fran lain we ol isten memba i no wanbel. Dispela em ol rot bilong skelim 66,000 refuji i stap long Itali na Gris bai wok. Ol refuji i stap yet olsem 54,000 bilong Hangari, tasol ol i bin senisim dispela plen taim Budapest i lusim. Dispela namba bilong ol pipel bai ol narapela Yuropien kantri i kisim bihain long disisen long neks yia.



Ol maigren i wet long lusim Hangari

FRONTEKS ejensi bilong Yuropian Yunien (EU) i kamap wantaim wanpela ges rekot bilong ol maigren olsem 107,500 i kamap long boda bilong EU long Julai. Ol dokta i wari long ol meri i gat bel, planti bilong ol i bin wokabout long planti wik long hap bilong paite long Midel Is. 'Mipela i gat planti meri i gat bel husat i pilim les na no inap long gohet,' volantia medikol sumatin, Sarah Schober i tok.



Klaimet Senis i ken kamapim birua bilong graun

KLAIMET senis bai putim ol ples sait long nambis olsem Sidni na Kalifonia long bikpela birua long graun bai lus na wara bai kisim ples, na solwara bai tait, wanpela stadi i tok olsem. Dispela risets, i kamaut long Nature Geoscience em i namba wan stail bilong graun i lus aninit long solwara long nambis long sait bilong Pasifik wantaim El Nino-Sauten Oskilesen (ENSO) klaimet saikel. 'Planti pipel taim ol toktok long klaimet senis na nambis, ol save toktok long level bilong solwara i go bikpela,' Marin Saintis, Profesa Andrew Short long Yunivesiti bilong Sidni i tok. 'Tasol level bilong solwara i go bikpela o no gat, mipela bai gohet long lukim senis i kamap long sait bilong nambis bikos long nogut saikel bilong El Nino na La Nina.



Tupela pilaia bilong Rabbitohs i pilim orait bihain long dring planti marasin

TUPELA pilaia bilong Saut Sidni Rabbitohs, Dylan Walker na Aaron Gray, i pilim orait long haus sik bihain long tupela slip long intensiv ke yunit (ICU) long haus sik bilong Sen Vincent long Sidni taim tupela i dringim planti marasin bilong stopim pen. Ol i hariap tru na kisim tupela pilaia i go long haus sik long Tunde moning bihain long tupela dring planti marasin. Dispela i kamapim wanpela hevi long NRL long lukluk long ol rot bilong givim ol marasin long ol pilaia.

Man i stap long kalabus bihain long pikinini i dai

WANPELA liklik meri i gat 12 krismas i dai long wanpela haus long Nu Saut Wels Hanta Veli na wanpela man i stap long kalabus. Ol i ringim polis long 5:45am long moning we ol i painim bodi bilong liklik meri. Long 8 klok long moning ol polis i kisim man i gat 31 krismas i go long kalabus long Rutafod. Polis i bilip olsem dispela dai em i domestik vailens. Sapos olsem, kain dai em namba 3 insait long NSW long tripela de. Ol i sasim wanpela man taim em i kilim meri bilong em i gat bel long Maunt Druit, long Tunde na wanpela meri wantaim aipas bebi bilong em i dai tu long Kempesi long Mande.

Wanpela man i plen long kilim Prince Charles i gilti

WANPELA man i gat retpela gras i driman long kilim Prince Charles na retpela gras pikinini bilong em, Harry bai kamap king wanpela de taim kot i painim em gilti bihain long em i mekim ol plen bilong em. Mark Colborne husat i gat 37 krismas i save pilim nogut long retpela gras bilong em i skelim em yet wantaim wanpela Nowe man, Anders Behring Breivik na raitim long ol plen bilong em long liklik buk bilong em long kilim Prince Charles. 'Mi bai sekrifaisim laip bilong mi long dispela wanpela sans. Kilim Charles na William na Harry bai kamap King. Kilim ol nogut lida,' em i raitim. 'Mi laikim ol long lukim senis bilong mi long wanpela i no gat mani retpela gras i kamap wanpela militeri teroris,' Colborne i raitim moa. Em i kisim ol infomesen long intanet long mekim ol bom na ol buk bilong mekim poisin. Ol i bin arestim Colborne long Jun 3 long las yia taim hap brata bilong em i painim ol kemikel na ol belat toktok bilong em long haus bilong ol long Sautampton long nambis bilong Inglan.

Pope Francis i go long Amerika

POP Francis i go long Amerika long namba wan raun bilong em, long 6-pela de raun long hap bihain long raun bilong em long Kuba. Wanpela Alitalia balus i karim dispela lida bilong 1.2 bilien memba bilong Roman Katolik sios i kam daun long ples balus long Andrews Air Fos Bes ausait long Wasington. Ol bikpela samting em, pop i kamap long namba wan raun bilong em, Pope Francis bai toktok long Kongres, UN. Dispela raun bilong Pop i kamap bihain long raun long Kuba we em i bin bungim Fidel Castro, olupela lida bilong Kuba. Presdien Obama, meri bilong em, Michelle Obama na tupela pikinini meri bilong ol i sekanim Pop Francis.

1611 KJV Baibel i kamap nesenenel tresa bilong PNG

Esther Bralyn Wani i raitim

PAPUA Niugini (PNG) i selebretim 40 yia bilong Independens long kain kain stail na rot long Trinde.

Planti ol kristen long olgeta hap long kantri i kam long Pot Mosbi long lukim 1611 King Jems Vesen (KJV) Baibel i bai stap insait long haus palamen. Sampela i no gat mani long kam tasol ol i gat bikpela tingting long lukim baibel long en na ol i wokabaut long Morobe na kam long Mosbi.

Olgeta kristen i kirap long traipela moning long 2 klok long Septemba 16 na bung long Unagi Oval. Ol i singsing, pre na wetim Baibel long kam bai ol i kisim i go long Haus Palamen.

Dispela KJV Baibel i raun long olgeta hap insait long kantri olsem, Kundiawa, Mendi, Wewak na Tambul long Westen Hailans provins.

Long wankain taim, sampela ol pipel i amamas long em bai stap insait long palamen tasol sampela i mekim kainkain no gut toktok long dispela 1611 KJV Baibel olsem em kago kalt na i bagarapim Spika bilong Palamen, Theodore Zurenuoc.

Tasol, long Septemba 15 bihain long Baibel go insait long Palamen, Spika bilong Palamen Spika Zurenuoc i tok, 'Devil i wok long mekim bikpela isu long dispela Baibel, nem bilong Baibel King Jems Vesen na yia bilong em 404 baibel dispela em namba tu samting. Namba wan samting em tok bilong God. Em i bikpela samting na namba wan samting tru, we tok bilong God i ken go insait long Palamen.

'Yupela ol pipel long Papua Niugini i ken lukim seten i wok long paulim tingting bilong ol man, devil i kamapim tu bel, ol wok long mekim tok olsem ol wok long mekim dispela 404 KJV Baibel i kamap olsem wanpela idol na karim raun, nogat, em tok bilong God mipela i toktok long en. Yupela i lukim olsem God em i gat pawa na em i gutpela tru,' Spika Zurenuoc i tok.

Em i tok God i gat plen na em mekim Papua Niugini i kamap daives o kainkain tok ples. Em i tok PNG i gat olsem moa long 800 kantri long wanpela liklik Ailan. Em i tok dispela em i no rong, God i gat plen long dispela kantri.

Spika Zurenuoc i tok, 'Devil i tokim kantri olsem mipela i mekim wanpela raun long rausim ol kalsa bilong kantri, em i giaman bikos em i papa bilong giaman.'

'Tumora (Septemba 16) i makim de bilong kros ova, mipela i laikim ol pipel i redi long wokabaut long stended bilong God long kantri, ol politisen long redi long wokabaut long stended bilong God, ol pipel long indastri long wokabaut long stended bilong God, ol sios long wokabaut long stended bilong God, long edukesen dipatmen, ol midia na ol yut long wokabaut long stended bilong God,' Spika i tok.

1611 KJV Baibel i redi long go insait long palamen long Septemba. Foto: Nicky Bernard



Long Septemba 16 long taim bilong Baibel long go insait long Palamen, Praim Minista Peter O'Neill i amamas long putim han antap long Baibel na tok welkam long kisim go insait long Palamen.

Mista O'Neill i tok, 'Mipela i selebretim 40 yia bilong kantri long mekim bilip bilong mipela kamap nupela. Buk i mas bungim yumi olgeta na yumi gat planti traib tasol wanpela Baibel tasol.'

'Mipela i mas kisim strong o skul tok long Buk, ol intanesenel komyuniti i gat bilip long PNG, na yumi yet tu i mas gat bilip long yumi yet. I no gat wanpela man i egensim dispela disisen, yumi mas bilip long wanpela God tasol,' Praim Minista i tok.

Bihain long dispela, Baibel i go insait long Palamen na bai stap olsem nesenenel tresa bilong PNG.

Ol famili bilong Dokta Gene Hood, meri bilong em Carolyn

Hood, namba wan pikinini man bilong em Randy Hood, na meri bilong Randy, Barbra Hood na pikinini bilong tupela Heshton Hood, na Angel Hood i bin kam long Amerika. Ol i laik lukim Baibel i go insait long Palamen we i driman bilong man, papa na bubu bilong ol, Dokta Gene Hood.

Dokta Gene Hood i bin kisim wanpela hap lip bilong Baibel long 1989 olsem 26 krismas i go pinis. Em wantaim pikinini bilong em Randy i amamas no gut tru na stat long mekim bikpela wok painim.

Bikos tupela i bilip olsem sapos i gat wanpela hap lip bilong 1611 KJV Baibel, i mas gat olgeta Baibel i stap long wanpela hap. Long dispela ol i painim inap ol i painim dispela Baibel.

Bipo long Dokta Gene Hood i dai em i tokim pikinini bilong em Randy olsem, 'God i mekim wanpela bikpela samting long Papua Niugini na mi bilip olsem em bai yusim dispela kantri long senisim wol,' Randy i tok.

Planti pipel i pulap long lukim Baibel. Foto: Freida Kana



Ol lida bilong sampela sios i karim Baibel go long palamen.



Stori bilong tumbuna

Sori singsing bilong Esemayata

Wanpela famili i stap long wanpela maunten ol i kolim Legepi'ae insait long Lufa Distrik.

Insait long dispela famili o hauslain i gat wanpela papa i stap na i gat 5-pela meri na wanpela pikinini man. Olgeta taim papa i save laikim tumas pikinini man bikos em wanpela tasol pikinini man na tu em man we em pasim dua bilong ol 5-pela pikinini meri. Ol susa bilong em wantaim ol hauslain tu ol i save laikim em tumas.

Nem bilong dispela pikinini man Esemayata. Ol famili o hauslain i stap longpela taim long dispela ples na ol i pilim les olsem na ol pasim tok long lusim dispela ples na i go long narapela ples o maunten.

Dispela ples ol i laik i go long en ol i kolim Haguvi'ae em long hap bilong Kogoraipa eria. Wankain taim tu i gat wanpela yangpela kum kat na resa meri we ol man i save lus weit long en i save i stap long narapela hauslain i stap klostu long em.

Dispela hauslain ol i kolim Ukunupi. Dispela meri salim tok i kam long mangi ya long bai tupela i kamap pren. Na long dispela nait Esemayata, i no kaikai na slip gut inap long tulait bilong wanem tingting i go pas pinis long dispela meri.

Long moning ol famili o haulain ol i redi na stat wokabaut i go long nupela ples. Tasol Esemayata les long go bilong wanem em i no fulfilim driman bilong em yet, em i slip long bet na i no redi yet long go.

Olgeta i go pinis tasol, papa na pikinini i stap yet, inap wanem, papa i no laik lusim dispela pikinini em i laikim tumas. Esemayata i kirap na lukluk i go long dispela hauslain na salim wanpela sori singsing na wari katim lewa wantaim tupela papa-pikinini wokabaut bihainim ol famili i go long nupela ples Haguvi maunten long hap bilong Kogoraipa eria. Singsing long tok ples Lufa em i olsem:

*Kamanae, Kamanae Ukunupi kamanae,
kamanae ve kamate vei kamanae lona
khai khai kamanae kamanae (2x)
Kamanae, kamanae lona khai khai
kamanae
kamanae lona khai khai kamanae
kamanae.*

*Eyae eyae eyaviyo eyae eyae, yoeya
eyae eyaviyo eyae eyae (4x) eyaviyo
eyae eyae.*

**Walter Tobung Tabu,
Hoskins**

TOKSAVE:

WANTOK i askim ol gutpela rida bilong em long salim ol **tumbuna stori** i kam na bai mipela i putim long niuspepa. Sapos stori bilong yu i gutpela na mipela i putim long niuspepa, bai yu winim **K50** we mipela bai salim i go long akaun bilong yu, o salim mobail unit inap long **K50** i kam long fon bilong yu. Salim nem, edres na mobail namba bilong yu wantaim stori i kam long dispela edres: *Stori Tumbuna, Wantok Niuspepa, C/Word Publishing Company, P O Box 1982, BOROKO, NCD, PNG* o email edres: editorial@wantok.com.pg Telepon namba: 3252500.

Tenkyu

Tavur Festival i kamap long Kimbe long Independens



Ol lain bilong Tanga Ailan long Nu Ailan provins

**Don Niles
Institut bilong Papua New
Guinea Stadis**

Long Kimbe, Wes Nu Briten Provins, ol i makim Independens De long Tavur Festival. Dispela de i soim amamas bilong provins na kantri. Long dispela yia ol i mekim olsem, tasol bilong makim 40 yia bilong independens, festival ya i stap long tripela de olgeta, long 14 Septemba inap long 16 Septemba.

Dispela Tavur Festival i kamap long Independens Pak, namel stret long Kimbe taun. Dispela tok *tavur* em nem bilong taur long planti tokples long dispela provins. Taur tu i stap long plak bilong Wes Nu Briten. Ol man i save winim taur long salim tok save na insait long sampela singsing tu.

Long 14 na 15 Septemba, em taim bilong harim ol stringben na ol kwaia bilong lotu na kwaia bilong skul. Planti kwaia bilong ol man o bilong ol meri o miks manmeri i kamap na makim ol Yunaitet, Katolik, Sevende, na Anglikan Sios. Ol praimer, sekenderi, na teknikal haiskul tu i soim kwaia bilong skul bilong ol. Taim ol singsing olsem i kamap, sampela ol arapela manmeri i pilai spot long narapela hap bilong Independens Pak.

NBC Kimbe i wokim laip brotkas long Tavur Festival. Wezon Multimedia Studio long Kimbe tu i gat wok long soim laip video bilong Festival long bikpela skrin ol i sanapim, olsem na maski yu stap long wanem hap long Independens Pak, yu ken lukim ol samting gut.

Long Independens De stret, ol flot i raun long taun bilong kirapim bel bilong ol manmeri. Long wokim flot, ol manmeri i bilasim ol yutiliti o daina long amamas long independens na sampela man na meri i bilas tu na sanap long baksait. Ol troimwe han o singsing o samsam i stap. Ol flot i raunim taun pastaim na bihain kamap stret long Independens Pak.

Ol flot i go insait na lainap gut. Planti ol skulmanki tu i mas i kam insait. Ol i holim plak bilong PNG o bilong wan wan provins. Dispela i

soim bikpela amamas bilong provins yet na long kantri tu. Em nau ol polis na ol CIS woda i mas i kam insait. Gavana bilong Wes Nu Briten, Sasindran Muthuvel, i kamap na inspektim ol polis na CIS lain.

Wanpela man i bin stap long Nu Briten bipo yet em Anthony Copeland. Em i amamas tru long kam bek gen long Kimbe long amamas wantaim ol manmeri long hap.

Ol bikman i bin toktok tu. Gabriel Bakani, siaman bilong komititi i kirapim dispela festival i go pas na bihain Williamson Hosea, provinsal administreta, i toktok. Bihain gen Gavana Muthuvel i stori long wanem senis i kamap long provins nau. Na tu, em i makim wanpela singsing i kamap antem bilong provins yet.

Bihain bilong ol toktok olsem, em taim bilong ol grup i wokim singsing tumbuna. Insait long namba wan grup i wokim singsing, pikinini meri bilong gavana i joinim ol meri long soim pasin bilong singsing *Sia*.

Bihain nau, planti grup bilong Wes Nu Briten i singsing. Tasol Wes Nu Briten em i nau ples bilong manmeri bilong planti arapela provins bilong PNG tu. Sampela i go wok long welpam, na sampela i kam long narapela wok tu. Olsem na ol singsing grup bilong Morobe, Isten Hailans, Nu Ailan, na Bogenvil tu i kamap na soim amamas bilong ol.

Long planti so olsem i mas i gat ol prais i stap antap long grisi pol. Long dispela Tavur Festival tu i gat grisi pol bilong ol man na narapela bilong ol meri. Ol manmeri i amamas tru long ol yangpela i resis long go antap long kism ol prais. Wanpela man na wanpela meri bilong Bali Ailan i winim ol dispela prais. Kas tru bilong ol lain Bali.

Tavur Festival em i soim planti gutpela pasin bilong Wes Nu Briten na ol lain i sindaun long hap. I luk olsem ol manmeri i amamas gut tru na no gat trabel i kamap long bagarapim dispela tripela de bilong amamas. Ol lain Wes i soim pasin tru bilong amamas long taim bilong Independens.



Junior Papaharihari Stringben bilong ples Mai, Wes Nu Briten.



Gavuvu United Church Mixed Choir, Wes Nu Briten.



Flot bilong Kimbe International School i raun i go long Independens Pak



Ol skul mangi i bung long Independens Pak



San i kukim ol manmeri long Independens Pak, tasol ol i amamas long ol singsing i kamap



Singsing Aiyik long Aiviklo Ailan long Kandrian, Wes Nu Briten



Ol man i holim pul na wokim singsing Aga em kam long ol lain Bola



TOK PISIN NEWS

from Radio Australia
radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service
6am - 7am 6080; 7240(KHZ)
7pm - 9pm 5995; 6020; 9710; 1280(KHZ)

Australia i mas lukautim ol sisonal woka



Oi Ni-Vanuatu Seasonal woka long Australia

Komisina bilong Leba Dipatmen bilong Vanuatu i tok Australia i mas mekim olgeta wok em i ken mekim bilong lukautim ol wokman na meri bilong ol Pasifik Ailan kantri taim ol i wok long Australia.

Komisina bilong Leba bilong Vanuatu, Lionel Kaluat i mekim dispela toktok bihain long wanpela bikpela miting bilong Pacer Plus em Australia, Nu Silan na ol Pasifik Ailan kantri i bin kamap long Samoa tupela wik i go pinis.

Toktok bilong em i kamap tu bihain long tingting bilong Australia long apim mak bilong

ol wokman na meri bilong Pasifik em ol i ken go wok long Australia.

Long dispela taim planti wokman na meri bilong Fiji, Kiribati, Tonga, Papua Niugini, Tuvalu, Vanuatu na Solomon Ailan i save salim ol woka bilong ol long wok long Australia.

Mista Kaluat i tok ol Pasifik kantri i save long sampela bos long Australia husat i save mekim nogut long ol woka bilong Pasifik taim ol i kam wok.

Planti moa long ol woka long ol dispela kantri i save go long Nu Silan.

Deputi Spika bilong ABG i kros long O'Neill



Oi meri i vout long ileksen

Deputi Spika long Atonomas Bogenvil Gavman, i tokaut strong egensim ol toktok bilong Praim Minista Peter O'Neill olsem sapos Bogenvil i vot long ol i kamap independen, em bai no minim ol bai kisim independens.

Mista O'Neill i tokim The Australian newspapa olsem Independens bilong Bogenvil em i samting PNG palamen nau wok long en.

Tasol Deputi Spika bilong ABG, Francesca Semoso i tok dispela kain toktok bilong Peter O'Neill em i krangki.

Misis Semoso i tok PNG gavman i mas

soim rispek long wanem ol pipel bilong Bogenvil bai tokaut long tingting bilong long Referendam bilong kisim Independens o nogat long 2019.

Em i tok gavman na ol pipel bilong Bogenvil i bin wok strong long stretim olgeta samting long redi long referendam, na em i hatim bel long harim Praim Minista O'Neill i tok olsem.

Misis Semoso i tok ol pipel bilong Bogenvil i bin kisim taim nogut tru, na PNG gavman i mas soim rispek long wanem samting ol i vot long en long referendam.

Malaita i tok tenkyu long Australia na Nu Silan



Oi polis blong RAMSI

Premia bilong Malaita Provins long Solomon Ailans i bin tok tenkyu long Australia, Nu Silan na olgeta kantri insait long Rijonal Asistens Misin long Solomon Ailans (RAMSI) long helpim bilong ol.

Moa long en, Primia Peter Ramohia i givim bikpela tenkyu long gavman bilong Australia na tu long Nu Silan long bikpela mani tupela i givim long mekim wok bilong RAMSI.

Dispela Rijonal Asistens Misin long Solomon Ailan we i gat ol kantri bilong Pasifik Ailans Forum i stap insait na Australia i go pas long en, em i bin go insait long Solomon Ailan long Julai 2003.

Oi i go aninit long wanpela operesen ol i kolim operesen "Helpem Fren" bilong pinisim pait na kamapim bel isi insait long kantri.

Dispela em long wanem i bin gat pait namel long ol pipel bilong Guadalcanal na Malaita - na em i lukim sait long lo na oda long kantri i

nogut na ikonomi tu i bagarap olgeta.

I kam inap nau, RAMSI i bin mekim planti wok tru na Solomon Ailans nau lukim bel isi i stap, lo na oda i gutpela na ikonomi i kamap strong gen.

RAMSI bai lusim kantri olgeta long Julai 2017 - tasol ol i bin wok pinis long daunim ol wok bilong RAMSI long Solomon Ailan.

Long wik i go pinis i bin lukim wanpela seremoni long Auki, kapitol bilong Malaita Provins bilong tok gutbai long ol Participating Police Force bilong RAMSI we i pinis nau long Malaita.

Primia bilong Malaita, Peter Ramohia i bin tok tenkyu long gutpela wok bilong ol.

Em i tok ol kantri insait long RAMSI i fren tru bilong Solomon Ailan.

Na Primia Ramohia i tok tenkyu tu long Australia na Nu Silan long bikpela mani tupela i putim long wok bilong RAMSI.

PNG i gat dinau long helpim Bogenvil

Oi Foto: ABC



Wanpela seremoni long Bougainville blong makim ol pipol husat ibin dai long crisis.

Wanpela lida meri long Bogenvil i tok Papua Niugini i gat bikpela dinau long Atonomas rijon bilong Bogenvil.

Frances Semoso husat i Deputi Spika bilong Atonomas Bogenvil Gavman i tok PNG i kisim planti mani we i bin kam long Bougainville Copper na Gold insait long 25 yia.

Misis Semoso husat i makim tu ol meri bilong Not Bogenvil long ABG Palamen i tok,

PNG i mas tingim tu bikpela hevi we i bin kamap long taim bilong Bogenvil krais.

Em i tok PNG gavman i mas bihainim wanem samting ol pipel bilong Bogenvil i vot long en long 2019 Independens referendam.

Misis Semoso i mekim dispela toktok bihain long Praim Minista Peter O'Neill i bin tok olsem, PNG Palamen yet bai givim tokorait - maski sapos Bogenvil i vot long kisim independens.

Flame Flour i sapotim Albert brata

GOODMAN Fielder International (GFI) i amamas long soim komitmen bilong Flame Flour long kantri na i sainim ragbi sta, Wellington na Stanton Albert olsem bren embeseda bilong kampani.

Flame Flour i stap wantaim ol famili na pipel bilong kantri moa long 30 yia na i givim strong na eneji long olgeta man, meri na pikinini i gat luksave long hatwok bilong ol mama long sapotim ol pikinini bilong ol i stap heli na strong. Na dispela taim i sapotim Albert famili.

Wellington na Stanton em tupela yangpela boi long famili we i gat 6-pela pikinini. Tupela i bilong Sauten Hailans husat i bungim planti salens long laip wankain olsem ol arapela yangpela

pikinini long Papua Niugini.

"Mipela i no bin gat planti mani na i bin gat liklik sans taim mipela i gro ap long famili," Wellington i tok.

Mama Warin Albert i tok, "Mi save yusim Flame Flour long kukim plaua bal na salim. Winmani mipela save sapotim famili long baim skul fi na baim kaikai bilong famili long haus."

Tupela brata i tingim yet, taim tupela i liklik ol i save karim plaua bek i go antap long maunten long mama bilong tupela bai kukim plaua bol. Kaikai plaua long moning taim em planti pipel long kantri i laikiam na ol pikini i save laikim tru na tupela brata i tingim yet.

"Wellington i tok mama bilong tupela i kisim tupela kam antap taim em i kukim Flame Flour na salim na

sapotim tupela. Sapos i no gat Flame Flour bai mitupela i stap long dispela level na pila ragbi long Australia o nogat.

Wellington em i namba wan Papua Niugini long kisim kontrak bilong NRL stret long PNG wantaim Pentrieth Panthers long 2014. Long stat bilong dispela yia, Stanton i bihainim lek mak bilong brata bilong em na i go pilai long Panthers long Holden Kap sait. Tupela wantaim i pilai long PNG Kumul.

Bikpela tok tenkyu i go logng mama bilong tupela long olgeta hatwok long kisim tupela pikinini i kam antap na nau tupela i makim kantri long pilai ragbi. Na Falme Flour i lukluk long sapotim tupela long wanem rot tupela i bihainim.



Warin Albert wanataim tupela pikinini man bilong em, Wellington na Stanton.

NDB Samit givim rekomendesen long Tred Minista

Stanley Nondol i raitim

NAMBA WAN bisnis Samit bilong ol Yangpela bisnis man na meri i lukim ol yangpela i laikim gavman i mas stretim planti rot long helpim ol mekim bisnis. Ol i givim sampela rekomendesen i go long Tred, Komes na Industri Minista, Richard Maru.

Moa long 40 yangpela man meri husat i mekim ol liklik bisnis na i stap insait long Youth Entrepreneurs Scheme bilong Nesenel Developmen Benk invesmen kisim K1.3 milien dinau long namba wan taim.

Ol yangpela bisnis manmeri i laik gavman bai lukluk long ol hevi na wari bilong ol long kamapim bisnis. Ol i givim rekomendesen long Tred Komes na Industri Minista bihain long tupela de samit long Pot Mosbi dispela wik.

Nesenel Developmen Benk i holim tupela de samit bilong ol yangpela long toktok long painim rot gavman ejensi na ol stekholda long wok bung long helpim ol yangpela long go insait long ol bisnis na kirapim kantri.

Ol sampela rekomendesen ol i givim long Minista Maru long glasim na kisim i

go long gavman em,

- Gavman bai putim sampela mani bilong SME bilong yangpela insait long DSIP mani bilong ol distrik.
- Gavman bai kamapim wanpela polisi long edukesen na salim ol sumatin i no kisim spes long yunivesiti na koles go long ol teknikel na vokesenel skul long lainim ol skil long helpim ol yet.
- Gavman givim moa mani long NDB we ol i ken kisim helpim long statim bisnis bikos em i hat long statim bisnis taim ol i no gat kepitol o stat ap mani.
- Gavman i mas kisim trening bilong yangpela bisnis manmeri i go long olgeta 89 distrik long kantri.
- Gavman i kamapim gutpela infrastraksa bilong infomesen na teknoloji long ol i ken mekim ol risets long bisnis.

Minista Maru i tok gavman i lukluk long helpim ol yangpela long kamapim bisnis na em bai kisim hevi na wari bilong ol i go long gavman . I gat bikpela wari olsem

moa long 20,000 sumatin i pinis long gret 10 na 12 tasol ol yunivesiti na koles i gat spes bilong 4,000 tasol. Ol 16,000 i go bek long ples na dispela namba i wok long gro olgeta yia, na sapos ol yangpea i no gat wok long mekim bai lukim kantri i stap long bikpela hevi.

Sif Eksekutiv Opisa bilong NDB Invesmen Des Yaninen, man husat i go pas long helpim ol yangpela statim bisnis, i tok em i hat long ol yangpela wokim bisnis bikos ol komesel benk i no save helpim ol long dinau o lon long statim bisnis. Em i tok komesel benk i laikim sekyuriti na ekwiti mani long helpim ol long bekim dinau.

Mista Yaninen i tok NDB Invesmen i lukluk long givim trening na stia tok long ol yangpela long ol i ken mensesim bisnis gut na i ken gro long bihain taim. Mista Yaninen i tok NDB Invesmen bai rausim ol hevi we ol yangpela i save bungim long ol i no gat mani long statim bisnis na dispela bai kamap bihain long ol i kisim trening. NDB i ken helpim ol wantaim stat ap mani na ol i ken bekim wantaim 6.5 intres insait long tupela yia.

PRK bai bim papagraun K40M dividen



Darekta bilong PRK Johnny Yawari, Menesing Darekta bilong MRDC Augustine Mano, Siaman bilong Galp provins Abraham Marupe, Gavana bilong Sauten Hailens William Powi na direktora John Kapi Nato.

Stanley Nondol i raitim

Petroleum Risos Kutubu (PRK) il tokaut long baim ol papagraun bilong Sauten Hailens na Galp provins K40 milien olsem fainol dividen bilong 2014.

Mista Mano i tok wok bisnis bilong PRK i kamap gut long 2014 wantaim Gros Revenu long K231,7 milien. Na long 2013 bin K138.7 milien. Na net profit i dabol long 2013 K65 milien i go long K120.7 milien long 2014.

Menesing Darekata bilong Minerel Risos Developmen Kampani (MRDC) Augustine Mano i toaut olsem kamapani i mekim moa winmani long 2014 long ai bilong ol darekta na ol siaman bilong papagraun bilong Sauten Hailens na Galp long Pot Mosbi.

Long K40 milien, K24 milien (60 pesen) bai go long ol iLG na invesmen. K16 (40 pesen) milien bai i go long

Sauten Hailens na Galp provinsal gavman.

Ol iLG o papagraun grup long SHP bai kisim K5.28 milien em Fasu, Apa Foe, Lowa Foe. Na ol iLG o papagraun grup long Galp provins bai kisim K4.32 milien em Kere-wos, Kibiris, Rumu na iKPS.

Mista Mano i tok bisnis i go long las 6 mun long taim bilong salim PNG LNG ges, kam daun bilong koporet takis long 50 pesen i go long 30 pesen na ol dividen i kam insait long ol arapela invesmen.

Mista Mano i tok PRK i bin investim K240 milien long las 4pela yia long winmani ol i mekim long baim 1.12 pesen ekuti long PNG LNG i lukim nau karim kaikai wantaim bikpela winmani.

Mista Mano i tok moa olsem long las 5-pela yia ol aset bilong PRK dabol long K781 milien na nau sanap long K1.55 bilien. Na net asset i grot u long K708 milien na

nau sanap long K965 milien.

PRK em namba tri bikpela seaholda long BSP na i gat 1.12 pesen long PNG LNG projek, i kisim 6.5 pesen long Kutubu oil paip plain na i em i gat bikpela seaholda long Pacific Property Trust na Hevilift. i gat 14 pesen sea long Pasifik intanesen! Hais-sik (PIH). i gat 42 pesen long Pearl Resort na nau kisim Star Maunten Plaza.

Gavana bilong Sauten Hailens William Powi i tok dispela em bikpela winmani PRK i baim namba wan taim long ol papagraun. Em i tok tenkyu long strongpela lidasip long MRDC na PRK long kamapim bikpela winmani insait long wanpela yia tasol.

Papagraun siaman bilong Galp provins Abraham Marupe i laikim PRK ana MRDC i mas kwiktai givim mani i go long poket bilong papagraun long ol i ken stretim laip bilong ol long ples.

JUHA PDL 09 Ges Projek i no gat ADR

JUHA PDL 09 Ges Projek Stering Komiti Seketeri, Frank Neobia na ol Eksekutiv bilon gem i singaut long Minista bilong Dipatmen birit long Petroleum na Eneji Nixon Duban na Gavana bilong Westen Provins Ati Wobiro long lukluk gut long Juha PDL 09 Ges Projek bilong lenowna pastaim long ADR bai go het.

Juha PDL 09 Ges Projek nau i stap olsem yumi olgeta i save olsem Juha em i hap bilong PNG LNG Projek tasol i no gat wok pepa o Agrimen i stap bilong Juha Ges Projek. LBBSA Agrimen ol i bin sainim long Soabi/Moro em i pundaun pinis.

Pastaim Minista bilong

Petroleum na Eneji William Duma i no sainim agrimen tasol em mekim toktok bilong em we i no bihainim Sientifik Indipenden Soseol Meping na lenona aidentifikesen ripot we Profesa entropolojis Dokta Tom Ernst i mekim. Na gen Dokta Lawrence Kameata, nara-pela entropolojis i lukluk long em gen na em i kamap wantaim wankain toktok tasol.

Mipela ol lenona bilong Juha PDL 09 Ges Projek i no wanbel long ADR bilong Juha PDL 09 Ges Projek long go het bihainim dispela toktok bilong Minista na mipela singaut long ol tim lida bilong ADR long no ken wokim ADR bilong Juha . Mipela nau singaut long

Jastis Kandagasi long holim ADR bilong Juha PDL 09 Ges Projek inap long taim Minista bilong Petroleum na Eneji Nixon Duban i makim STET na Gavana Ati Wobiro i makim Flai Riva Provinsal Gavman (FRPG) long opisali sainim dispela Juha LBBSA Agrimen pastaim ADR bilong Juha lenona i ken go het.

Flai Riva Provinsal Gavman, mas wokim len verifikesen pastaim long em i sainim dispela LBBSA agrimen we i bagarap pinis. Em i sindaun antap long en longpela taim tumas.

Juha Ges Projek nau i no nap wokim ADR bikos em i no gat ol klen we Nesenel Gavman na Provinsal Gavman i luksave long ol yet.

Wokim bisnis long stretpela pasin: MP Trape



Memba bilong Mul Baiyer na bisnisan Koi Trape.

SME sekta bai sapotim baset bilong kantri

Stanley Nondol i raitim

OL liklik bisnis o SME sekta em i impoten sekta long helpim kantri long gro na sapos gavman i laikim bikpela senis i bai kamap long laip bilong ol pipel, groim ikonomi, mekim planti winmani bilong kantri na helpim ol pipel long kam aut long turangu laip, em i mas sapotim SME long gro.

Minista Bilong Tred na Komes Richard Maru i tok taim gavman i lukluk long putim bikpela mani long helt na edukesen sekta we em i impoten, SME sekta em impoten, em bai mekim winmani bilong kantri i long inkam takis, VAT, kampani takis na planti moa.

Kantri i mas lukluk long sapotim SME, mekim inap mani na bihain yusim long ol sekta we i no inap long mekim mani olsem helt, edukesen, na ol arapela sevis sekta.

Minista Maru i tokim ol

yangpela bisnis man meri long Pot Mosbi bihain long tupela de samit olsem wanpela as kantri bilong yumi i bungim ol hevi bilong no gat inap mani bikos ymui feil long groim SME sekta long sapotim ikonomi bilong kantri.

Minista Maru i tokaut olsem gavman i tok orait pinis long bikpela SME polisi dipatmen bilong em kamapim long kantri bai i gat 500,000 SME insait long 30 yia. Na tu long kisim ol risep bisnis bek long ol ausait lain wantaim sapot bilong gavman.

Em i tok bikpela lukluk bilong polisi em long groim SME sekta long 49,000 i go long 500,000 SME kampani long 2030.

Em i tok dispela em isi bikos ol kantri olsem Nu Silan na Malaysia we i no gat inap risos olsem PNG i go moa long dispela namba.

Wanpela tok piksa Ministam Maru givim em kantri

Nu Silan i no gat risos olsem, gol, kopa, maining, LNG, oil tasol SME bilong ol em 500,000. Na populesen bilong ol em olsem 4 milien.

Malaysia i gat 500,000 SME na gavman bilong Malaysia i save putim 19 bilien long wanwan yia long sapotim SME.

Em i tok moa olsem SME bilong PNG bai baim bek ol risep bisnis we stap long K10 milien na kam daun bikos nau planti bilong dispela bisnis em ol ausait lain i mekim na papagraun kamap wokman na kisim likli pe.

Dipatmen na Ministri bilong Tred, Komes na industri long liklik taim bai lonsim nupela SME Polisi na Mata plen bilong kantri.

Minista Maru i tok em i lukluk long gavman bai givim inap mani long 2016 baset long mekim wok annit long nupela SME poisi na plen.

Stanley Nondol i raitim

LONG kamap bisnis man na meri na groim bisnis i go bikpela moa, yu mas wokim bisnis long stretpela pasin na tok nogat long pasin korapsen. God em i as bilong olgeta samting na em bai blesim hatwok bilong yu.

Dispela em toktok bilong memba bilong Mul Baiyer, Koi Trape i go long olgeta yangpela pikinini long Papua Niugini husat i laik wokim bisnis long sapotim famili, na kantri.

Mista Trapei i kamap na toktok long wanpela bikpela na namba wan kibung bilong ol yangpela bisnis manmeri long Pot Mosbi i tokim ol yangpela long rot em i bihainim long kamap bikpela bisnisan.

Mista Trape i tok em i no wanpela skul saveman olsem ol arapela. Em i tok em i statim bisnis bilong em long ples, we em planim

kaukau na i save salim i go long Mt Hagen Teknikel koles bipo long 1979.

Long dispela taim prais bilong ol samting bin daunbilo. Em i tok em i bin gat K40,000 na i go askim Nesenel Developmen Benk, dispela taim ol i kolim Egrikalsa Benk, long narapela K40,000 dinau long em laik baim wanpela 10 wil bikpela kar.

NDB i helpim em wantaim K40,000 na em i baim bikpela trak long K80,000. Dispela 10 wil trak nau em ol i salim namel long K600,000 na K800,000.

Em statim bisnis long wanpela trak tasol na i kam inap nau bisnis bilong em i gat klostu long 100 trak mekim bisnis long kantri.

Mista Trape em wanpela bel isi man na save daunim em yet. Na em wanpela strongpela lotu man i save putim God go pas long olgeta samting.

Wanpela salens em i givim

long ol yangpela bisnis man na meri em, "Wokim bisnis long stretpela pasin na tok nogat long pasin we i doti na God bai blesim hatwok bilong yu. Sapos yu laik wokim kwik mani na kisim mani long pasin korapsen long wokim bisnis bai yu lukim kaikai bilong em i narakain."

Narapela salens em i givim long ol yangpela em taim yu kisim dinau long benk long wokim bisnis yu mas bekim gut na benk bai helpim yu long groim bisnis.

Mista Trape i tok planti pipel i laik kisim fri mani long ol bisnisan, memba na planti taim ol i kisim dinau long benk i no save bekim gut.

Mista Trape i tok bikpela amamas long Nesenel Developmen Benk Invesmen long kamapim bikpela bung bilong ol yangpela na kmapim trening long skulim ol yangpela long kamap lida long bisnis long gutpela bilong kantri long bihain taim.

I no gat inap wok: Maru

Stanley Nondol i raitim

Minista bilong Tred Komes na Industri Richard Maru i tok kantri long las 40 yia i feil long kamapim ol wok, opim rot bilong bisnis na gutpela sindaun bilong ol pipel.

Minista Maru i tok maski Papua Niugini i gat planti mineral risos olsem gol, kopa, oil na ges, namba bilong ol pipel i no gat wok long fomol sekta em i bikpela tumas. Na namba bilong ol gret 10 na 12 i kam aut long skul na no gat wok i go antap long 80 pesen.

Minista Maru i mekim dispela toktok long taim em i pasim tupela de samit bilong Nesenel Developmen Benk (NDB) Invesmen we planti yangpela bisnis manmeri i bung na miting long painim rot long opim bisnis.

Minista Maru i tok eduke-

sen sistem long kantri i no gat inap teseri edukesen long givim sans long bikpela namba bilong ol gret 10 na 12 long kisim save. Em i tok populesen bilong kantri i gro bikpela na kantri stap long mak nogut bikos namba bilong ol yangpela i wok long gro.

Statistiks bilong gavman long 2015 i soim olsem moa long 20,000 gred 10 na 12 i pinism skul tasol gavman i gat spes long 4,000 sumatin long yunivesiti na koles. Na moa long 16,000 i stap nating long ples na ol siti na taun.

Moa long 1 milien pikinini i go long skul stat long 2012 bikos gavman i putim bikpela mani long fri edukesen. Tasol namba bilong sumatin kam aut long edukesen sistem i wok long go antap bikos no gat inap spes long ol i go het.

Bihain long 40 yia bilong

independens;

- 40 pesen bilong ol pipel long kantri i stap aninit long poveti lain.
- 10 pesen bilong ol pipel tasol i gat sans long kisim pawa saplai
- 20 pesen i kisim benking na fainensel sevis, 80 pesen i no gat
- 90 peen bilong fainensel bisnis sekta em bilong ol ausait lain na PNG i gat 10 pesen tasol.

Minista Maru i tok sapos ol dispela hevi i kamap long narapela kantri em bikpela samting tumas na ol pipel bai straik na gavman bai pas. Na 5-8 pesen bilong ol pipel i no gat wok em bikpela samting.

Minista Maru i singaut long ol yangpela bisnis manmeri long wok hat long tekova long ol bisnis we nau ol ausait lain i holim.



Opening seremoni bilong NDB samit long Holiday Inn Hotel, Pot Mosbi.



Senia meri bilong 2015 Yang Awot, Mis Nyda sanap wantaim Minista Maru na wanpela BSP wokman makim sponsa. Ol foto: Nicky Bernard

Wok bung long menesim tuna risos

Veronica Hatutasi i raitim

OL PASIFIK Ailan kantri i kisim strongpela askim long wok bung wantaim long menesim gut ol tuna risos na tu, long kamapim ol polisi bilong sanapim ol faktori long prosesim ol tuna pis long rijon yet.

PNG Minista bilong Fiseris na Marin Risos, Mao Zeming i mekim dispela toktok long taim bilong opim Namba 5 Pasifik Tuna Konprens long dispela wik Tunde long Sofitel Hotel, Nadi long Fiji. Samting olsem 400 pipel

wantaim Fiji Minista bilong Fiseris na Fores, Osea Naiqamu, Minista bilong Fiseris long Kiribati, Tinian Reisher, Gavana bilong Oro, Garry Juffa, bikman bilong Inforfish, Dokta Abdul Basir Kunhimohamed, Manesing Dairekta bilong Nesanel Fiseris Atoriti long PNG, John Kasu, bikmeri bilong Fud na Egrikasa Ogenaisesen (FAO) long Rom, Jacqueline Aider, ol lidaman long gavman bilong Fiji na PNG na tu, long Pasifik na ol lain i makim ol kantri bilong ol long Yurop, Yunaitet Stets na Saut

Amerika, Esia, Australia na nu Silan i kamap na stap long dispela bung.

“Yumi luksave olsem em i bikpela samting long wok bung wantaim na tu, wantaim ol lain i gat ol invesmen o bisnis long rijon bilong yumi, wantaim ol wan wan gavman ejensi, ol NGO, ol lokal gavman na ol komyuniti long serim ol tingting na edresim ol wari yumi gat long menesim gut na developim ol tuna risos bilong yumi,” Minista Zeming i tok.

Minista Zeming i tok gavman bilong PNG bai go het



PRESEN: Manesing Dairekta bilong NFA, John Kasi i givim wangepa presen i go long Dairekta bilong INFORFISH Dokta Abdul Basir Kunhimohamed.



OL BIKMAN: Dairekta bilong INFORFISH, Dokta Abdul Basir Kunhimohamed, Fiseris na Marin Risos Minista, (namba 2) Mao Zeming, Fiseris na Fores Minista bilong Fiji, Osea Naiqamu, Intanesenel Tuna tred wantaim FAO long Rom, Jacqueline Alder na Menesing Dairekta bilong NFA, John Kasu long opening seremoni. *Oi Poto: Veronica Hatutasi*

long hostim na sapotim Pasifik Tuna Forum bikos long ol dispela bung, yumi ken toktok long ol bikpela samting i karamapim tuna risos long yumi long dispela rijon na ol stekholda long tuna fiseris sekta.

Minista Zeming i tok PNG i bin lukim olsem i gutpela long Pasifik rijon i holim tuna bung bikos rijon em i papa bilong ol tuna long wol, na long wol tuna bung i save kamap long Singapore, ol kantri long Pasifik i no save autim ol wari bilong ol o i gat

sans long toktok bikos toktok bilong ol arapela bikpela kantri i save kamap strong.

Pasifik rijon na moa yet, Westen na Sentrel Pasifik, i save kamapim 50 pesen tuna long wol.

Tasol stat yet long yia 2007, namba wan Pasifik Tuna Forum i bin kamap long Pot Mosbi, PNG. Dispela bung i kamap olsem ples we ol ailan kantri long Pasifik na ol stekholda long fiseris sekta i ken bung long autim tingting na wari, kamap wantaim ol polisi na

wok long developim na stiaim gut tuna risos na bisnis long dispela rijon.

Long wankain taim, Fiseris na Fores Minista bilong Fiji, Osea Naiqamu i wokim wankain toktok na tok tuna i bikpela risos long Pasifik na dispela bung bai toktok, glasim na skelim ol wok biloing tuna menesmen, maketing, risets na developmen bilong dispela bikpela risos bilong yumi long Pasifik.

Opisal bung i bin pinis asde.

ELCPNG Nesanel Luteran Yut Konprens - ELC Ukata Distrik Bai Hostim

Paulus Tali i raitim

ELCPNG Nesanel Luteran Yut Konprens i kamap dispela wik long ELC Ukata insait long Kabwum Distrik. I gat bilip olsem planti yut bai kam long wanem 17 distrik bilong ELCPNG bai salim 50 deliget bilong ol. Planti bilong yut bai kam long sip na sampela long balus.

Kain konprens bilong ol yangpela i save kamap long olgeta 2-pela yia. Long 2013 konprens bin kamap long Henganofi Haiskul long Kainantu Distrik, na wainkain taim tu Nesanel Pasto konprens bin kamap long Kainantu Sekenderi skul.

I gat bilip olsem moa long 1,500 yangpela bilong ELCPNG bai kamap long Kab-

wum Praimeri Skul. Konprens i stat long Septemba 20 i go long 25.

Long lukluk long nau yet yut kodineta bilong ELC Ukata distrik Turkey Nariyong i tok, ol Kristen manmeri nau bai soim tru bilip bilong ol bikos hatwok long rot bilong transpot bai planti bai kamap o nogat.

Ol Kristen bilong Ukata

givim taim tru long hostim konprens na wok redi kamap i gut tru. Foapela kona bilong Ukata olsem Yus LLG, Deyamas LLG, Selepet LLG na Komba LLG i givim bikpela taim na hatwok.

Mista Nariyong i tok ol Kristen bilip manmeri bai soim tru bilip bilong ol na kaikai bilong Kristen wokabout bilong sios ol bai soim

olsem ol bin lukautim nesanol sinod long yia, 2002.

Kodineta Mista Nariyong tok tenkyu long memba bilong Kabwum, Bob Dadae long sapot bilong em wantaim JDPC bilong Kabwum Distrik wantaim K500,000, na Morobe Gavana Kelly Naru i putim K100,000.

Gavana, Naru bin stap baksait long ELC Ukata yut

taim ol kisim Konprens long Henganofi 2013. Long konprens ol yut bai toktok long wok bilong HIV na Aids, Faiv Sta Program na toktok long wok gutnius i mas go moa long kongrigesen, paris, na distrik.

Ol yut bai kam long wan wan distrik bilong ol putim kalsa singsing bilong ol bihainim Miti Kraiss in Kalsa.

Wau pipel mas go pas long lukautim bisnis

Paulus Tali i raitim

LONG Fonde Septemba 9 samting olsem 1,500, manmeri na pikinini i kamap long Wau insait long Bulolo Distrik long lukim memba bilong Wau-Bulolo na Oposisen lida, Sam Bail i opim nupela supamaketa Jaharandi.

Mista Basil i tokim ol man meri olsem nau ol i ken amamas long lukim nupela supamaketa, bai i helpim ol long ol i kisim sevis klostu long ples. Planti taim ol pipel long Wau, i save go daun long Lae, westim moa mani, long i go painim sevis.

“Nau yumi gat supamaketa bilong yumi yet. Long dispela mi laik salensim yupela pipel long lukautim gut stoa bilong yumi,” Mista Basil i tok.

“Yumi lukautim gut bai em inap long helpim

yumi kamap papa bilong Jaharandi stua. John Collin, wangepa man bilong Australia, tasol em i bin stap bipo long Wau, em tingting long kirapim bisnis na helpim yumi.” em i tok.

Mista Basil i tok Wau, em histori, eria olsem na sapos ol pipel i kamapim planti business bai moa ikonomi kam insait na Wau Bulolo, Distrik bai inap Senis.

Nupela Supamaketa Jabanaradi em i gat ples bilong bakeri, na haus kai, na opis bilong baim gol, pipel bilong Wau, bai amamas long nupela supamaketa. Papa bilong dispela stua em John Collin, wangepa Australia, husat bipo i bin i stap long Wau, na em kam bek long bringim sevis long Wau.


Mista Basil i tok, “Yumi pipel long wau, lukautim gut bai Jabanaradi supamaketa, lukautim yumi isi long soping bilong yumi i no ken hat wok i go kam longLae.”



Ol yut lida bilong ELC i sanap redi long statim program long ELC Ukata.



Ramu NiCo bringim Chinese akrobet long amamasim PNG Indipendens



Tupela akrobet lain wokim han sanap



Balensim na holim stik long maus



Chinese akrobet grup wantaim ol lain gest



Kontrolim 4-pela ambrela long han na lek



Kontrolim tebol long lek tasol na spinim antap

RAMU NiCo Menesemen (MCC) i amamasim 40 Yia Indipendens Anivesari bilong Papua Niugini long wanpela spesel wei taim em i bringim wanpela akrobet grup blong China i kam olgeta long Madang long wokim kain kain stail ekt blong ol.

Dispela spesel akrobet so i bin kamap long SVD Memorial auditorium long Divine Word University, na i lukim moa long 500 manmeri we Ramu NiCo i salim invitesin long ol na tu ol lain sumatin bilong DWU.

Ol lain akrobet grup i kam long Chongqing Municipal

long China aninit long Komisn bilong Kalasa na Ministri bilong Kalsa bilong Pipols Ripablik of China I sponsa long lon long kam long PNG long amamasim 40 Yia Anivesari blong PNG Indipendens.

Dispela grup i soim tru kain kain ol pilai bilong ol we planti lain i no save lukim bipo.

Ol meri i kain kain longpela stik na karim long maus bilong ol tasol, na long wanpela ekt tu i lukim wanpela meri i silip tasol na yusim lek bilong em long tromoi wanpela liklik tebol i go antap kamdaun. Long narapela ekt tu i lukim dispela meri i tro-

moi wanpela hevi dis i go antap kamdaun.

Dispela ol lain akrobet stail bilong ol em narakain tru we planti lain long Madang natu long Papua Niugini i no bin lukim bipo

Presiden bilong Ramu NiCo Menesemen (MCC), Wang Jicheng i long ofisal welkam bilong em long dispela nait pastaim long so i to akrobet pilai em i stap long kalsa bilong ol pipel bilong China moa long 2000 yia.

"Dispela kain pilai i save nidim gutpela na strongpela balens long bodi we i yusim kontrol bilong tingting na tu bilip blong yu yet. Dispela i

save nidim strong strong bilong manmeri na moa trening long save long pilai dispela kain spot." Mista Wang i tok.

Mista Wang i tokaut tu long posisen bilong Ramu NiCo olsem Projek i bungim planti salens tru stat long taim bilong konstraksen i kam inap long taim bilong operesen. Tasol Kampani i save tingim na putim veliu i go long sapot em i save kisim long ol komyuniti na pipel insait long komyuniti em i wok long en na tu ol stekholda we em i save wok wantaim.

Mista Wang i tok taim gutpela wok-bung namel long

PNG na China i go strong em moa gutpela long lukim tu moa pasin bilong serim kalsa namel long tupela kantri tu i mas kamap.

Em i tok kain ol kalsarel eksens bai kamapim gutpela wok-bung namel long tupela kantri na tu Ramu NiCo.

Mista Wang i tok dispela ol lain akrobet grup bilong China i soim stret pasin tumbuna o kalsa bilong China em moa long 2000 krismas.

"Taim dispela grup i soim kalsa bilong China, mipela i save tu olsem PNG i gat planti kain kain kalsa na kastom na mipela i amamas long stap na serim wok

namel long tupela kantri long sait long bisnis na ekonomiks," Mista Wang i tok.

Em i tok insait long 21st sensuri taim wol i wok long toktok long multi-kalsarel diplomesi, yumi ken strongim pasin bilong kalsa na wok-bung namel long ol pipel bilong yumi long kain pilai olsem akrobet.

"Long makim 40 yia anivesari bilong PNG Indipendens, mi bilip olsem dispela so bai bringim amamas na strongim bilip bilong ol manmeri blong PNG long kalsa bilong China," Mista Wang i tok.



Ramu NiCo Management (MCC) Ltd,
the manager of Ramu NiCo Project is proud to host the 5th
NATIONAL MINING EMERGENCY RESPONSE CHALLENGE
in Madang

Date: August 22-25, 2015
Venue: DWU & PNG Maritime College



An initiative of:
National Apex Mining Safety Council



Under the auspices of:
Mineral Resources Authority

Japan i win long Ragbi Wol Kap

MAN Australia na kosa bilong ol Japan, Eddie Jones, i tokaut olsem Japan i daunim Saut Afrika 34-32 long Ragbi Wol Kap em i namba wan taim long laip taim bilong em long kamap kosa na winim dispela top level pilai.

"Mipela i wok hat tru. Mi stap kosa bilong Japan inap 20 yia na long dispela pilai mi wokhat tru bilong Japan we mi no save wok olsem bipo," Jones i tok.

"Mi tok tru long yupela olsem, mi bai no inap long wokhat olsem gen, long wa-

nem, mi kamap lapun pinis. Taim mi bungim 55 yia, mi bai stap long Barbodas na lukim kriket i stap."

Jones i go pas long ol Japan Wallabies i go insait long ran-ap level long 2003 tonamen na i stap konsalten bilong wanpela tim husat i daunim Saut Afrika long 2007 long wankain taim.

Dispela em i namba wan taim bilong Japan long win long wol kap insait long 24 yia, bihaine long ol i winim Zimbabwe long yia 1991 tonamen.

"Olgeta sapota insait long

pilai graun i amamas na sapota bilong ol Springbok i singaut strong tru long ol i ken win, tasol mipela i daunim ol wantaim tupela poin," Kosa i tok.

"Long histori bilong Japan, ol i no save win long wanpela taim tasol nau dispela histori bilong Japan long Ragbi Lig i senis."

"Nau ol i laik kamap olsem Michael Leitch o Ayumu Gorumaru. Japan bai hostim 2019 tonamen bai senisim nus-pes bilong spot insait long Japan bikos ol namba wan pilai i pilai ragbi nau."



Nu Silan i daunim Argentina 26-16



LONG Ragbi Wol Kap, Nu Silan All Blacks i daunim ol Argentina Pumas 26-16 long wanpela pilai graun long Wembey.

Skoa bilong ol All Blacks i sanap olsem 12 long 56 minit taim Pumas i stap 16, tasol All Blacks i aburusim ol taim hap bek Aaron Smith na fowod Sam Cane i bin skorim tupela trai.

Flai Hap Dan Carter i kikim 16 poin bilong ol Nu Silan na birua namba bilong em, Nicolas Sanchez, i skorim 11 poin bilong ol Argentina.

Oi Nu Silan i putim Cane long pilai long namba tu hap. Em i bin pilai strong liklik na i

brukim banis bilong ol Pumas. Em i ran strong yet aninit long tupela pos na i putim bal long graun we ol skruim poin bilong ol i go antap.

Kepten bilong ol Nu Silan, McCaw na Senta Conrad Smith i mekim bikpela asua long ai bilong ol Argentina na ol Argentina i putim wanpela trai long 21 minit. Oi i mekim na All Blacks i stap long bikpela presa insait long 10-pela minit taim Pablo Matera i stap aut yet long pilai graun.

Kik bilong Sanchez i mekim na ol Argentina i stap pas 13-12 long nambawan hap bilong pilai i kam long mak.

Nu Silan i pilai strong long namba tu hap na pasim bal kwiktai long kisim planti skoa taim Sonny Bill Williams i kam insait, tasol banis bilong ol puma i strong tumas insait long wanpela aua.

"Wembley em i wanpela mejik ples long pilai, tasol mi bin pilai gut na winim ol Argentina," McCaw i tok.

Namel long 89, 019 manmeri i lukim pilai i stap, planti bilong ol i sapota bilong Argentina na i daunim ol toktok bilong ol sapota bilong Nu Silan, tasol All Blacks i kisim strong long las minit na daunim ol Pumas.

Guerra; pilai egensim Brisbane bai kamap olsem Orijin

FOWOD bilong Sydney Roosters, Adian Guerra, i ting olsem dispela fainal bai wanpela strongpela gem namel long ol Sydney Roosters na Brisbane Broncos.

Lang Park pilai graun em i wanpela amamas pait hap bilong ol Broncos long dispela sisen long wanem, ol i wok long winim ol narapela tim taim ol i pilai long dispela pilai graun.

Guerra i tok olsem ol Roosters i redi long pilai olsem Orijin long dispela pilai.

"Mi lukluk olsem hap bilong pilai bai pulap long ol birua sapota bilong mipela, tasol em bai kamap

olsem wanpela gren fainel o Stet ov Orijin pilai graun," Guerra i tok.

"Mipela yet mas toktok long dispela. Gem bai kamap strong tumas bikos ol Broncos i save strong long olgeta de bilong wik, tasol mipela mas putim olgeta kala bilong mipela i go pas.

"Mipela i wankain bikos mipela olgeta i kam insait long fainel bilong dispela sisen."

Long dispela sisen, Broncos i winim ol Roosters 22-18 long Lang Park pilai graun long raun namba 6 na Roosters i winim ol Broncos 12-10 long raun namba 24 long SFS pilai graun.

Roosters i winim ol Canterbury Bulldogs 38-12 long Fraide nait na nau ol i kisim ples long pilai wantaim ol Broncos.

Namba tu kepten bilong ol Roosters, Mitchell Pearce, i no pilai long semi-fainal bikos em i bin kisim bikpela bagarap, tasol em i pilim orait na em bai kam bek gen long pilai wantaim ol Brisbane.

Dispela bai namba wan pilai bilong faiv-eit bilong NSW bihain long taim em i bin kisim bagarap egensim ol Broncos long raun namba 24.

"Dispela bai strongpela sapot taim Mitchell i kam bek," Guerra i tok.



Roosters na Cowboys i kisim ples bilong tupela gen

SYDNEY Roosters i daunim Canterbury Bulldogs na i kisim ples bilong em gen bihain long wanpela lus long fainel na wankain samting i kamap long ol Cowboys husat i daunim ol Cronulla Sharks bihain long wanpela lus long fainel tu.

Las wik pilai bilong NRL em ol do-o-dai gem i kamap i kam inap long dispela wiken pilai. Tupela namba wan tim bai go antap olgeta long top tu na bai pilai gren fainel.

Not Kwinlan na Roosters i kamap wankain stret long fainel na olgeta narapela tim i bihainim tupela.

Oi Cowboys i winim 15 gem stat long raun namba 4 i go inap long raun namba 22 na kalap go insait long top tim resis.

Wanpela tim husat i daunim ol Cowboys tupela taim em i Cronulla tasol i no gat strong bilong en. Cronulla i winim ol Roosters wanpela taim tu tasol i no gat strong long win bilong ol tu.

Oi Sharks i go antap long Townsville long raun namba 16 wantaim ol Cowboys na ol papa graun i kisim 18 poin taim ol Sharks i no bin kisim wanpela poin yet long namba wan hap. Tasol, long namba tu hap, ol Sharks i putim 4-pela trai we olgeta kik bilong ol i go insait na skoa i sanap olsem 24-18.

Bihain long dispela lus bilong ol Cowboys, ol i winim 4-pela gem long lain, bipo long wanpela gem bilong ol i

kamap long Shark Park.

Oi Sharks i stap pas wantaim 18-0 long namba wan hap na long namba tu hap ol i skruim skoa bilong ol i go antap long 30-18 na Cowboys i lus.

Oi Sharks i pilai gut stret long histori, tasol ol Cowboys i pinisim namba tri ples long ol fainel resis.

Bikpela hap-bek bilong ol, Johnathan Thurston, i soim olgeta strong na kala bilong em na i go pas long karim Cowboys i go insait long fainel resis.

Oi sharks i winim ol Cowboys tupela taim pinis na ol i ting olsem ol bai winim ol gen, tasol Cowboys i bin givim strongpela snuka long ol wantaim 39-0.



Digicel i givim K65, 000 long Netbal PNG

DIGICEL i givim K65, 000 i go long Netbal PNG long 14 Septemba long sapatim Digicel Nesenel Netbal Sempionsip we i save kamap long wanwan yia.

Long dispela yia, pilai i kamap long Alotau, Milen Bei Provins. Ol i statim pinis dispela pilai long Mande, 21 Septemba na ol bai pinis long Sarere, 26 Septemba.

Alotau i hostim dispela gem pinis long yia 2008 na nau Alotau i mekim tok promis olsem gem bai kamap namba wan stret na olgeta manmeri husat i stap wantaim long dispela gem bai amamas bikos ol i gat ol nupela spot fesiliti.

Ol i tok tenkyu long ol lokal bisnis insait long komyuniti na Memba bilong Alotau, Charles Abel, long givim bikpela sapat.

Long dispela pilai, i gat 16 netbal asosiesen i pilai long sempionsip resis bilong dis-

pela yia. Ol dispela asosiesen em Alotau, Tabubil, Kiunga, Is Nu Briten, Kerema Distrik, Wes Nu Briten, Motu Koita Wes, Motu Koita Saut, Kairuku-Hiri, Wewak, Madang, Kavieng, Lae, Sentrel na Manus.

Ol i statim dispela pilai wantaim ol Junia Tonamen long 21 Septemba i kam inap long 23 Septemba na ol Open Tonamen bai stap pilai long 25 Septemba na pinis long 26 Septemba.

Husat asosiesen bai kism nesenel taitel bilong dispela yia em ol bai makim ol long anda 21 trening skwad long redi long ol bai pilai long anda 21 Wol Kap Kwailaia long Auckland, Nu Silan long 2016.

Ol i askim ol asosiesen long salim olgeta top junia pilaia long stap insait long dispela sempionsip.

Het bilong ol konsuma long Digicel, Khattar Fehmi i

tok olsem, stat long yia 2009, Digicel i sapatim netbal long PNG na nau ol i lukim olsem bikpela senis i kamap long netbal.

"Olgeta meri long olgeta hap long kantri i save laikim netbal. Digicel Faundesen i lukluk long strongim ol meri long kantri aninit long spot, long kopret level na komyuniti level bikos em i bikpela samting," Fehmi i tok.

"Mipela i ting olsem yumi mas wok bung long strong ol asosiesen olsem netbal PNG long em bai sapatim ol yangpela meri na ol mama long spot."

Presiden bilong PNG Netbal, Julienne Leka Maliaki, i tok tenkyu long Digicel long ol i givim taim bilong ol long sapatim ol meri long spot olsem netbal.

Maliaki i tok tenkyu tu long Memba bilong Alotau, Charles Abel, long sapatim na strongim ol meri aninit long spot.

Piksa i soim K65, 000 sek ol Digicel i givim long PNG Netbal long 14 Septemba, 2015.



Makim bilong PNG Praim Minista XIII tim i pinis

OL Nesenel selekta bilong Papua Niugini i tokaut pinis long ol pilaia husat bai pilai long anda 16 tim na Praim Minista XIII pinis.

Ol i sanap antap long ekspirians ol i save i gat long makim ol pilaia na tu ol i lukim ol pilaia husat i redi gut long pilai engensim ol Australia bihain long dispela mun.

Long taim bilong toksave long ol dispela pilaia, Siaman bilong PNG Ragbi Futbal Lig, Sandis Tsaka, i tok olsem, ol i makim ol pilaia husat i save pilai long Digicel Kap na tu ol pilaia bilong konfederesen.

"Ol i kism planti taim liklik long toksave long dispela tim long ol pablik bikos ol i bihainim ol rul na salim ol pilaia i go long Praim Minista pastaim long kism tok orait," Tsaka i tok.

Ol i no kism ol pilaia bilong SP Hunters tim bikos ol i stap insait long fainal bilong Intras Supa Kap.

Praim Minista XIII pilai bai kamap long Septemba 26 long Sir John Guise pilai graun long nait.

Anda 16 intanesenel pilai namel long ol Nu Saut Wels tim na PNG tim bai opim Praim Minista XIII yia pilai.

Long PNG anda 16 tim, ol i lukluk long ol pilaia husat i bin pilai gut long Nesenel Konfederesen sempionsip pilai i bin kamap klostu taim long Lae long dispela mun.

Ol pilaia bai pilai long PNG Praim Minista XIII em,

- 1 Watson Boas (Agmark Gurias)
- 2 Radley Brawa (TNA Lions)
- 3 Sydney Fred (Lae Snax Tigers)
- 4 Benjamin Hetra (Hela Wigmen)
- 5 Andrew Ipi (Hela Wigmen)
- 6 Chris Jerry (Agmark Gurias)
- 7 Noel Joel (Lae Snax Tigers)
- 8 Philemon Kimisive (Goroka Lahanis)
- 9 David Loko (Lae Snax Tigers)
- 10 Sam Maniai (Noten Konfederet)
- 11 Isaac Mell (Mendi Muruks)
- 12 Moses Meninga (Mt. Hegen Eagles)
- 13 David Missian (Agmark Gurias)
- 14 Justin Olam (Lae Snax Tigers)
- 15 Daniel Pai (Agmark Gurias)
- 16 Sebastine Pandia (SNS Port Moresby Vipers)
- 17 Albert Patak
- 18 Junior Rau (Mt Hagen Eagles)
- 19 Enock Sine (TNA Lions)
- 20 Charlie Simon (Lae Snax Tigers)

Ol Tim opisal; Stanley Tepend em i tim opisa bilong Lae Snax Tigers na em bai stap namba wan kosa. James Kops bai kamap namba tu kosa na em i tim opisa bilong Mt Hagen Eagles.

George ToBata em i trena bilong Agmark Gurias na em bai kamap trena bilong PNG PM XIII nau. Namba tu trena bilong ol em i Toua Kohu, husat i trena bilong ol Sauten Konfederet. Jacob Angra bai kamap tim menesa bilong PM XIII.

Ol pilaia bai pilai long anda 16 em,

- 1 John Amos (Noten Konfederet)
- 2 Rickson Eno (Noten Konfederet)
- 3 Kawage Ginigua (Noten Konfederet)
- 4 Jetro John (Hailans Konfederet)
- 5 Joachim Lolok (Niugini Ailans Konfederet)
- 6 Cedrick Maima (Noten Konfederet)
- 7 Saka Sagaimiria Mairi (Sauten Konfederet)
- 8 Emmanuel Parua (Sauten Konfederet)
- 9 Danley Peikili (Noten Kongfederet)
- 10 Jackson Philip (Sauten Konfederet)
- 11 Brian Pok Sauten Konfederet)
- 12 Allan Reatau Rau (Sautenkonfederet)
- 13 Raymond Rocky (Hailans Konfederet)
- 14 Charles Sul (Hailans Konfederet)
- 15 Nathan Tente (Niugini Ailans Konfederet)
- 16 Norman William (Hailans Konfederet)
- 17 Carlos Wularia (Niuginig Ailans konfederet)

Ol Tim opisal bilong anda 16 em, Dennis Miall bilong Noten Konfederet bai stap namba wan kosa na namba tu kosa em i Iru Mai husat i kam long Sauten Konfederet.

Trena bilong Noten Konfederet, Francis Moya, bai stap trena bilong ol na Menesa bilong ol em i Margaret Mairi husat i bin stap opisa bilong ol Sauten Konfederet.



POT MOSBI Ragbi Lig i wok long go strong nau bihain long Digicel Kap resis i pinis. Planti long ol pilaia bilong Vipers na Isapea i go bek long wanwan klap bilong ol na pilai long strongim tim bilong ol long go insait long fainal. PRL resis i go insait long raun 22 we planti tim gat sans long stap insait long fainal. Poto i soim las yia sempion Taragau i strongim sait bilong em yet long stap insait long fainal bilong dispela yia.

TVWAN bai soim olgeta ragbi pilai

TVWAN i kism ples pinis long soim Praim Minista XIII pilai bai kamap long Sande long dispela wiken na Melanesian Klap sempionsip long televisen.

Ol narapela televisen stesen olsem EMTV na Kundu 2 bai no moa soim ol pilai olsem Nesenel Ragbi Lig (NRL) long Australia we ol i save soim pastaim.

Siaman bilong PNG Ragbi Futbal Lig, Sandis Tsaka, i tokaut long las wik Fraide olsem TVWAN i mekim sampela gutpela samting long groim ragbi lig pilai insait long Papua Niugini wantaim ol nupela na nambawan wokabaut, na i mekim sanel bilong olgeta ragbi insait long kantri na long ol narapela kantri wantaim.

"Nau TVWAN bai givim planti taim long gem bilong mipela long soim long televisen na long narapela sait, mipela bai helpim ol wantaim gutpela program we olgeta pipel i save laikim na dispela i soim olsem mipela i mekim wanpela gutpela patnasip," Tsaka i tok.

"Dispela em i wanpela komosal patnasip na gutpela sait bilong dispela em mipela bai no moa peim ea taim mani we mipela i save peim bipo.

"Long bipo, ragbi lig long PNG i save peim ol televisen stesen long soim ol gem na em i save kamap olsem takis mani we ragbi lig i save rausim long baset bilong en.

"Nau mipela bai no inap long mekim olsem gen bikos long sevim sampela mani.

"Long ol narapela kantri, ol televisen stesen i save peim long kism ol televisen rait na nau long PNG, mipela i mekim wankain samting long developim kantri.

"Ragbi Lig em i no spot tasol, nogat. Mipela i menesim long em i ken kamap olsem wanpela bisnis long strongim ragbi i go het."

Tsaka i tok moa olsem sans bilong ol narapela televisen stesen long soim gem em i stap yet long kantri.

"Mipela i toktok wantaim olgeta televisen stesen long PNG na mipela i makim TVWAN bikos em i save soim Nambawan na gutpela prodak long sait bilong ragbi," Tsaka i tok.

CEO bilong TVWAN na Digicel Pilai i tok, "Digicel i sapatim lokal PNG ragbi insait long planti yia na nau em i mekim spona yet."

"Taim mipela i kamapim TVWAN long 2014, mipela i tingting long soim nius na spot long wanwan de insait long PNG."

PNG Judo Federesen

i kisim 100 Judo yunifom



Embesada bilong Japan long PNG, Morio Matsumoto, i givim 100 yunifom bilong judo i go long Presiden bilong PNG Judo Federesen, John Jambert, long las wik Fraide.

FAIVPELA Judo instrakta long Japan i kam long Papua Niugini long 18 Septemba na ol bai stap inap 27 Septemba. Ol i givim 100 judo yunifom long PNG Judo Federesen aninit long "Spot bilong Tumora" Program bilong gavman bilong Japan.

Embesada bilong Japan long PNG, Morio Matsumoto, i tok welkam long 5-pela judo instrakta na i givim 100 yunifom bilong judo i go long presiden bilong PNG Judo Federesen, John Jambert, long las wik Fraide.

Ol 5-pela judo instrakta em Shinichiro Sato i gat 50 krismas na em i kam long Takusyoku Yunivesiti long Japan, Tomohiko Ichimaru i gat 39 krismas bilong Kanagawa Prefectural Polis, Kouji

Kakamu i gat 37 krismas na em bilong Aichi Prefectural Polis, Hiroyuki Miyake em i bilong Hiroshima Prefectural Polis na Yuuki Kubato em i gat 28 krismas na em i bilong Kantogakuen Yunivesiti.

Spot bilong Tumora em i wanpela program we Praim Minista bilong Japan i tokaut long 2013 olsem em i wanpela program bilong intanesenel kontribusen insait long spot.

Dispela program em i bilong skruim spot na spirit bilong olimpik na paralimpik gem long olgeta pipel na ol yangpela husat bai kamap pilaia long bihain taim.

Em i gutpela tru long kamapim nem bilong kantri na painim gutpela sindaun long bihain, taim ol i resis gut wantaim olgeta kantri. PNG bai stat pilai long

2014 i go inap long 2020.

Mipela i ting olsem ol judo yunifom we 5-pela judo asosiesen long Japan i givim em i bikipela samting long PNG Judo Federesen.

Ol judo instrakta i soim ol skil na trenim ol PNG Judo pilaia na kosa long Pot Mosbi na Goroka inap long taim ol i stap long Pot Mosbi na Goroka.

Embesi bilong Japan i laikim olgeta PNG judo pilaia na kosa long trening strong long winim Tokyo Olimpik na Paralimpik pilai bai kamap long 2020.

Dispela yia em i wanpela gutpela yia bilong Embesi bilong Japan long ogenaisim sampela kalsaral iven bilong Japan long tingim bek 40 yia eniveseri we Japan na PNG i kamapim rilesensip bilong tupela.

Alotau na Motu Koitabu Saut i kwalifai long olgeta junia netbal fainel

TIM Alotau na Tim Motu Koitabu Saut i kwalifai long olgeta divisen long junia netbal fainel long 2015 Digicel nesene netbal sempionsip long 22 Septemba.

Dispela pilai i kamap long Alotau, Milen Bai na long asde (Trinde), olgeta divisen bilong Tim Alotau i bin go long fainel bikos ol i sanap antap long asples bilong ol na kisim moa strong.

Ol divisen we Alotau na Motu Koitabu Saut i kwalifai long fainel em anda 13, anda 15, anda 17 na anda 21.

Long anda 13 divisen, Alotau i kamap namba wan ples wantaim 9 poin na i no gat wanpela tim i daunim ol.

Motu Koitabu Saut i kamap namba tu ples wantaim 7 poin na Motu Koitabu

Wes i kisim 5 poin. Tim Lae i kamap namba fosa ples wantaim 3 poin.

Lae i winim olgeta 7-pela pilai na kamap namba wan wantaim 21 poin long anda 15 divisen na Alotau i kisim 19 poin na kamap namba tu ples.

Namba 3 ples long anda 15 em Sentral i kisim wantaim 19 poin na Motu Koitabu Saut i pasim namba fosa ples wantaim 15 poin.

Alotau gen i kamap namba wan long anda 17 divisen wantaim 13 poin na Motu Koitabu Saut tu i kisim 13 poin.

Motu Koitabu Wes i kisim namba 3 ples long kwalifai wantaim 11 poin na Sentral i pinisim namba fosa ples wantaim 9 poin.

Las divisen em i anda 21 na Sentral i stap long top ples

wantaim 22 poin. Kairuku Hiri i kwalifai long anda 21 divisen tasol na i kamap namba tu ples wantaim 20 poin na Alotau i kisim 20 poin tu.

Motu Koitabu Saut i pasim namba fosa ples wantaim 18 poin.

Dairekta bilong tonamen, Helen Havora, i tok olsem tim husat i stap long namba wan ples bai pilai wantaim namba fosa ples na namba tu ples bai pilai wantaim namba tri ples long fainel.

"Ol wina bai go long gren fainel na ol lusa bai pilai gen long kisim namba tri na fosa ples taim lusa bilong gren fainel tim bai kisim namba tu ples," Havora i tok.

Ol i bin pilai dispela fainel long asde (Trinde) we pilai i stat long 9 klok moning.

PNG Weitlifting Federesen i salensim ol sempion weitlifta

PAPUA Niugini Weitlifting Federesen (PNGWF) i laikim sempion weitlifta, Dika Toua na Steven Kari, long raitim pas i kam long stretim asua i kamap long federesen.

Toua i tokaut aninit long tupela Hanuabada Weitlifting klap long las wik na i tokim intarim edministresen long lusim sia.

Long wanem as em i bin tok olsem bikos i no gat wanpela yia jenerel bung ol i save holim long 5-pela yia i kam inap nau na ol i setim dispela intarim edministresen.

Ol klap i tokaut long ol wari bilong ol tu olsem ol i save trenim ol nambawan pilaia long planti yia, tasol i no gat wanpela sapot bilong gavman na federesen na nau ol fesiliti na ikwipmen i kamap.

Toua i tokaut tu long ol belhevi em i gat long en olsem

em i nesene kosa, em i no stap insait long hap bilong mekim seleksen tu.


Presiden bilong PNGWF, Sir John Dawanincura, i bekim toktok bilong em olsem, "Dika Toua na Steven Kari bai no inap long daunim mi long toktok bilong tupela long midia taim mi no save gut long wanem samting tupela i toktok long en."

"Tupela etlit i save gut tru long ol stretpela toktok we ol

geta etlit husat ol i makim pinis em ol bai trening long PNG Olimpik Hai Pefomens trening senta," Sir John i tok.

"Nau tupela bai go long we, taim tupela i no helpim ol eksekutiv bilong mi long 2011 taim ol i makim mipela long namba wan taim long AGM long Ogas?"

"Olgeta samting i gol long histori na tupela wantaim i kamap top etlit long menesmen bilong mipela."



Steven Kari i apim ain long Pasifik Gem.

Kavieng i lainim netbal gut tru

TIM Kavieng em i namba wan taim bilong em long pilai long Digicel netbal nesene sempionsip na ol i lainim planti rul bilong pilai taim ol pilai egensim olgeta strongpela tim long kantri.

Kavieng i salim tupela tim tasol long anda 21 na senia divisen long dispela sempionsip pilai.

Long anda 21, ol i lus long 5-pela

gem, tasol ol i win long wanpela gem we ol i bin daunim ol Sentral.

Tasol, kosa bilong Tim Kavieng, Wendy Ugui, i tok, "Mi amamas yet long tim bilong mi bikos ol pilaia i lainim planti samting long dispela sempionsip pilai."

"Planti ol gel i no save go aut long ol narapela provins, tasol mipela i winim wanpela gem em i bikipela samting na

mi gat bikipela bel amamas long dispela.

"Tim bilong mi em i yangpela tumas na mipela bai lainim ol asua gut na givim gutpela salens long narapela resis bai kam.

"Sampela ol pilaia olsem gol difens Rosey Ruin, senta Ada Ugui na gol kipa Salome Api i soim planti gutpela kala bilong pilai na mipela i amamas tru."



Travel to Losuia

Come Experience a Unique Culture!



Linking our Country  LinkPNG

Ol poto: Nicky Bernard



KAM HELPIM MI: Pilaia bilong PMSA i lukluk long ol wan pilaia bilong em long salim bal, taim pilaia blong Tabubil i ran kam long stopim em long Besta Kap resis bilong Sauten long Bisini soka graun. PMSA em sempion bilong ol meri Sauten.



BESTA KAP: Tupela tim bilong ol man i pilai long semi fainel bilong Besta Kap bilong Saunten Rijen.




Pacific MMI Lewas tim



LUSIM MI: Pilaia bilong Taragau wantaim bal i pusim pilaia bilong Bataflai long A gret pilai bilong ol long Mari Bareks pilai graun. Taragau i winim pilai.



YU KAM: Pilaia bilong Taurama i kikim bal taim pilaia bilong Gordons Kokofas i traिम long pasim. Taurama i winim pilai na bai go long Gren fainel long wiken antap.



IMPROVED TASTE! Niupela teist wantaim planti mit na oil. Teistim na bai yu laikim moa yet.

DIANA

Tuna



Emi tuna
bilong PNG

PROUDLY
PNG
MADE

Manufactured by



RD Tuna Canners Ltd.

Moa mit na
oil insait



TUNA IN OIL

Koupa 3 i winim Sauten Lek

BAL WE?



Pilaia bilong PMSA (wait) i traim long abrusim pilaia bilong Tabubil (blu) long semi fainel bilong Besta Kap bilong ol meri long Sauten rijon. Foto: Nicky Bernard

Besta kap

KOUPA 3 em i wanpela tim long Hula i kamap sempion bilong Besta Kap Sauten Lek tonamen.

Ol i daunim Koupa tim 2 long soka gren fainel long Bisini pilaia graun long Mande we skoa i sanap olsem 2-1.

Long dispela pilai, resis i kamap insait long 4-pela de na long gren fainel, wanpela pilaia bilong Koupa 3, Kora Waea, i putim wanpela gol long 16 minit long namba wan hap bilong pilai.

Ol i strongim banis bilong ol gut tru na ol Koupa 2 i no bin putim wanpela gol inap long pinis bilong namba wan hap bilong pilai.

Eki Vali husat i pilaia bilong Koupa 2 i putim wanpela gol long 76 minit long namba tu hap na skoa bilong ol i stap 1-1.

Bihain long dispela, tupela tim wantaim i strong na presa i wok long kirap na tupela i misim planti sans bilong tupela.

Ol sapota bilong tupela tim

wantaim i sanap long sait na putim planti presa tu long ol pilaia na gol kipa taim gol kipa i stopim sampela gol ol i traim long putim go insait.

Klostu taim i pinis na long 88 minit, Walo Lini, pilaia bilong Koupa tim 3 i sanap long kona na kikim bal i go insait long net na skoa bilong ol i kam antap 2-1.

Tim 2 i traim no gut tru long pait bek, tasol Kaupa tim 2 i strongim banis bilong ol inap long pinis bilong namba tu hap na ol i win.

Long fainel bilong ol meri, Pot Mosbi Soka Asosiesen i daunim ol NCD Pablik Sevans Asosiesen wantaim wanpela poin 1-0 we kepten bilong ol Deslyn Sune i putim.

Sune i bin kamap kepten tu long PNG Tim long 2015 Pasifik Gem.

Olgeta 4-pela tim bai pilai aninit long Sauten Rijon long Besta Kap fainel long pinis bilong mun i kam.



ISUZU N-SERIES

the Perfect Business Partner.

**BOROKO
MOTORS**

Port Moresby 325 5255 Lae 472 1144 Madang 422 2659 Mt Hagen 542 1933 Goroka 532 3552 Kimbe 983 5035 Kokopo 982 8193 Tabubil 649 9048

Email: info@borokomotors.com.pg | Web: www.borokomotors.com.pg



MEMBER